


含光詩

(上)




陳含光手
寫所作詩

四十四年臺北正中

書局印行





Digitized by the Internet Archive
in 2010 with funding from
York University Libraries

陳雪屏先生及諸公既不鄙昏老
謀印其儷體文先生復親見過商
所以付印之術且慙且感無以置
詞事具文序中又以拙詩亦寫有
清本遂并印之光多而好詩其曰
光宣朝者前朝作也其曰壬子後
者三十四歲後也乙亥歲暮自用
楷字寫為二冊則其年五十七又
二年續有所作別以行楷寫之目

為續入詩則其年五十九冬而日
寇陷揚州矣繼作詩遂未寫今寫
本并携來臺付攝影竟光五十後
始悟詩唯情之旨遂作論詩絕句
意謂俗說蕩盡則詩教已明故其
言有破而無立來臺後倡詩人合
一之論以為詩者凡人之情也人
之情萬變而不齊故古今詩迄無
一人相似者然必熟於古人積歲

月以醞釀之以得其達情之法字
句音節是也非倣之也久而與之
化也論其源則一法不立語其流
則萬法兼收今人或曰師古或曰
創作則是詩與人對詩與人對則
詩自詩而人自人於是併己之力
以求詩雖所作極工求所以為真
詩者亦已寡矣故光之為詩非唐
人非宋人非同光體亦非非同光

體稱心而言佇興而就成為一己
之詩而已工拙非所論毀譽亦非
所計其能人與詩合詩與論合否
耶抑猶未也世之君子通風雅之
情者幸有以教我乙未四月江都
陳含光原名延韓序於臺北時年
七十有七

目次

五古一百五十四首

七古九十九首

五律一百二十五首

七律一百十四首

五言長律十五首

五絕八十七首

七絕一百四十六首

論詩絕句二十首

續入詩五古五首七古七首五律
十二首七律八首五言長律二
首七絕十二首

四部中集為最多集之中詩為最多其略熟於今人耳目者猶約百家居今日而作詩其能與古人爭勝耶縱使如曹劉李杜其人已死骨朽久矣故生平非唯不敢嗜利亦復不甚喜名以為得及良時佳日引滿銜杯於願已足何事費心勞力以益故紙簾為其自處常在魏晉諸賢之間幼而好詩不能捨去非欲有所成就也五十以後始悟詩唯情之旨其說具論詩絕句中顧自爾以來世變日亟年晚事多所作反往：多意而少情有自語相違之過知之非難踐之為難固如此也性本簡率中無城府故其詩淺好竒兼愛不主一家故其詩雜此二者最吾詩之大救至其他小：疵繆隨處皆有不能自見賴知者指摘之也時

因暇日錄為一編藉存已往之跡以示知好吾論詩殆可
謂直指根原一空部障至其所自造作不足觀不足觀已
亥除夕舍光陳延韓書時年五十有七

含光詩

五言古詩



癸巳秋九月 大人自濟南歸省明年秋李公帥山左時
倭寇方擾登萊閒飛書來召以文檄相屬 祖父官京
尹盛京東北王師屢敗績 祖母以七十之年居揚州
大人不欲往而事不可辭 男譚因作詩送焉十六歲
作 以下光宣朝

故人上河梁執手且嗚咽況茲兵戈際復此骨肉別昨夜
月當午剝啄聞叩門云是幕府書待草露布文王事敢不
勤家室那得顧豈不欲暫停行李已戒路送 親出東郭

問 親意何如親言無他語但屬常寄書 祖母七十年

我行非得已遊子夢庭闈那不念甘旨況聞海上師遇敵
輒風靡神州尚戒嚴羽檄雪相似 祖父官大尹受恩恥
言歸家書儻報警勿使老人知受語語未闕風帆去如瞥
親飯何處餐 親舟何處歇黯黯白日暮蕭蕭北風寒
行路日以遠衣裳日以單默坐數水程應向高郵宿珠湖
三十六額 親且遊矚又有木瓜酒色若琥珀殷願持慰
寂寞聊可賴 親顏別離苦悽惻欲解百無榮傳語報平
安中路風吹隔書成百餘字一字一徘徊淮水東南流何
時雙鯉來

雪中作三首

浙：夜聲作蕭屑在高林鳥轉空城曙人稀寒雪深悠然
陶潛宅寂歷道心生地鑪始難火幽窗方罷琴誰能悅空
宇風篠遞寒音

手把玉杯書開函映窗隙不知江上寺凍雪封幾尺蕭騷
松桂中應有僧歸跡鐘響深在雲江聲寒入石何當蹈危
閣一望千里白

歲暮相勞苦斗酒烹隻雞甯要洛陽道五花驕馬嘶東皋
滿時稼風雪橫荒蹊溪寒水汨汨決起幽禽啼思著綠蓑
笠濁醪趁偏提

題倪燦青綠畫扇二首

虹橋春水晴橋上聞流鶯此時誰家子艤棹望江城冥：

雜花落漠、柳絲生千里不可極悵悵玉簫聲

春水綠鴨頭春帆欲東鴛人尋水閣會酒熟啼鶯處佳辰
臨上已綠滿揚州樹遙知南浦人沈吟此中去

雨中與諸兄弟集

虛堂留清香苔徑少塵色人閒竹氣滋池涼雨聲急煩襟
既消散喫諢了不隔清觴湛微流蔬筍在瑤席誰為明月
句逸情遂遙集

從兄笙友出所為望月詩寄懷山澤殊有遙想

不知山澗中焉遇

采芝客清言雜夢寐晚坐益蕭瑟樓高度涼雲松淨有餘
滴將行時命燭夜思紛如積無為風雨宵惆悵林中笛

美女篇

曲江二三月美女行芳春柔莢正荏苒輕波亦潏淪映水

駐繡轂援花下朱輪瑤、象衝韻嫺雅妙入神孔翠為首
飾明珠閒寶玕下白練裊靜若春波勻南山采翠色飄
忽沾朝顰借問女何氏家本居咸秦姊妹三五輩窈窕齊
絕倫左手擅刀尺右手工組紉前有金吾子過我求昏姻
女子重高義所貴非要津春陽上人衣顚采澗底蘋母使
青鳥來銜我紅羅巾

筵罷有懷

中筵歇殘酌相思未能寫密雨暗寒更沈沈滿遙夜栖禽
南樹急紅燭西堂地車馬一東西勞心徒上下朝來不忍
視餘芳滿空榭

淳化帖祖本上有章廟純廟璽記恭賦

法書久煙消官帖賸鉤勒何來金薤賞遺我龍蛇跡嫵媚
棗木刻銀鑲深襞積文存臣箸摹價並昇元值瑩々向千
載紙墨如不隔藏室蓬萊山珎皮想在昔聖人倬天章雲
漢煥輝赫押璽魚鳥文糝用珊瑚赤恭惟祖宗聖日月疊
雙辟文明協龜書聲教通象譯西清富流覽此物最前席
何時玉府頒遂若香案謫遙々繭紙帖玉篋尚求索昭陵
悲飛灰遺事誚隘阮帝王家天下尤物甯所惜遷移偶人
閒聊比寫青核嗚呼淳化軒別本有刻石真傳幾翩翻反
為賈豎獲夜光抵鵲驚瓊寶銜鷗啣數典尚從祖列聖況
手澤羽琤縱煙霏天威不違尺野人美芹獻道在文武策
空堂生古香盥手記飛白

園中對春雨效韋體二首

不知曉齋雨衣上忽冷然却望深竹際蕭條已似煙鳥轉
樹陰寂魚噏水紋圓不對芳尊酒中情徒自悵
雨堂已寂寂茲辰愈難度俯覺坐隅空同心在何處稍看
苔上階靜念花穉樹春賞良已違何由憺吾慮
聽夜雨效韋體

涼颼時械：高閣夜悠：長簟方知冷懷人思正道荷衰
南塘露竹動北園秋殘更與楚雨並此入離憂

泛舟遊焦山上尋觀音閣

江北向江南雲山已佳趣江南試延望目擊情益寓水客
命帆檣亂流指孤嶼稍聞松下鐘漸辨崖際路茲山應劫

後樓觀一何鉅前軒抱澄江丹翠屢回互
疏簾映虛白茗椀對鷗鷺的々天際帆離々霧中樹背山境幽絕石墜囊
檣柱江聲繞我足相去無十步俯聞潛蛟泣平見飛鳥度
澄明弄千頃萬象豁呈露山風野蕭條藤竹暝將暮願謝
焦先廬仄足難久駐

枕江閣觀楊樹山墨跡長卷

午登枕江閣古木忽異色其下臨長江洶々千丈黑心知
精靈聚欲辨良未測山僧啟緇囊肅拜展煙墨平生慕伊
人於此遺遺筆平原與北海末路兩嗟咄忠誠蔽霄壤遊

藝亦無敵想見裴創時濡墨氣蕭瑟頗聞雷文鼎本自分

宜出誰何託空王兼使靈境黜吾將句五丁霹靂下神物

江風振几閣三歎淚盈臆

出北城向甘露寺行山閒城上村舍竹木江山之美左右

映帶

荒城何逶迤斜徑轉高嶺夕陽憺人心空翠相與永嵐光
出衣帶繚繞一江影竹樹隱人家鳴禽悅暄景野人古巾
冠照水時自整地瘠寡所營耕田每同井紅巾昔蔽天樓
櫓滿黍警得此非偶然生逢太平幸

感逝四首

茫然一掬淚中有六載情反恨六載長恩義日以盈昔日
一咲言今日一涕零涕零亦有限豈能酬合併貴憑此漣
漣寄之達冥冥亦知泉下人見此為不甯居恒恐我傷有

戚必隱聲今誰強啖慰使我哀心平我哀如可平人死亦可生

風蓬泊無根飄然遂千里因依女蘿枝纏綿奉君子蓬生固蕉萃蘿弱難可恃霜風吹故宅靡：生荆杞自從軒車來六親半為鬼中宵起長歎淚落不可止負爾有千端欠我唯一死荷：無復言死者長已矣

死心已成灰病骨猶卧席就我陳決絕復畏我悽惻相哀反相諱聊言病匪棘慎汝金石軀努力強飲食心知是永別各：內霑臆辟彼將離魚濡沫且相溼焉知此比目一坼不復匹反悔臨決時百語未及一死生孰云闊其間不容息昨者不肯言今者歎何益

入門聞孺子燈下戲牽我與之行繞室再三四瓶壘
故依然餐餌紛滿器焉知空堂中汝母已虛位汝幼豈識
母面特與母似撫此雙髻了益我萬絲淚居恒親保抱出
入憂跌躓棄去何太忍脫若瓜委蒂黃泉雖及九子念豈
有二有夢夜來歸無夢長棄置

邯鄲才人嫁為厮養卒婦

掩淚拭殘粧含情別華殿照人頭上月昨夜宮中見未脫
新舞衣猶持舊紈扇鄰里過相悲他時記曾羨將沈致升
易持貴作賤難橄欖先苦澀梅子常後酸寄語苧蘿人莫
羨吳宮好幸不殖榮華何傷浣紗老

開歲一月淫霖曠旬又閒以雪閒居無營有慨於懷輒著

一篇凡得十首次而錄之

大雨江漢傾細雨琴筑鳴開年三十日日：風雨并雨脚
有時斷愁陰無日晴因寒復成雪皚：林端明居跂一可
樂出無跬步行已矣勿復道沈陰令人老

江梅初作花風雨繞其樹三朝雨不止如雪復落去草木
有本意飄蕪亦何懼豈慕牆下蒿芄：遂侵路

融雪晚未已春雨勢更加隔牆過行笠蕭如蟹爬沙又如
泛江湖船背摩蕪葭紛：入竒想念此思浮家何時一蓑
衣醉卧風雨斜逢人笑相問漁父非我耶

時過如飄風上元已佳節朗月潛素輝空庭耀寒雪連甍
望燈火三兩乍明滅當年盛春燈里巷殷轆轤珠簾十里

香綺戶萬家月夜遊車馬閑歸路簫鼓咽今年獨何事所
向泥活、回頭夢釣天合眼爛銀闌繁華豈足尚民氣此
焉悅頻年困誅求萬事等倉卒皇天復淫雨下土愁艱
夜窗風竹夏百念肝肺熱

街衢積流潦十步浩縱橫途人且斷絕況乃車馬行閭里
苦好事近局遣見迎籃輿雨中出繞足皆水聲升堂炳明
燭解履濯冠纓歡言酌春酒談笑露平生即事自可樂餘
者安足營嘈、絲竹響檐溜如盆傾

去年大徵兵閭左樹赤羽鳴、畫角聲雨中發江浦今年
鄉校開遊士聚如組衣冠立塗泥講議不知苦斯人幾伊
臯比屋競方虛吾生嬾嬖久力欲守環堵掩關卧空榻十

日聽鳴雨多憂恐天漏欲倩誰手補時英滿中達杞論安足吐開門望風色黑蜺作人舞

淵明苦連雨乃賦獨飲詩得仙非所好故老信未知頗解贈以酒斯人亦云奇醉歌易水句寫作荆軻詞猛志逸四海渾之以酒卮茫々雲鶴翼八表孰能羈

揚雄寂寞人其性頗耽酒著書擬易象妙欲窮萬有不知千載下竟有子雲否文章本區々疲精為奔走此身猶委蛻姓字復誰某未若手一杯冥然與天友

客從遠方來相為道朝政公卿滿天闕縷々陳氏姓夜雨聲復喧亂之不容聽幸有酒一杯痛飲莫辭罄君言已竟未吾醉欲高詠

燭影何爛：雞聲亦喑：感之動中情檢書起徘徊紛然
三古下治亂多如柴孤鳴任風雨獨善甯為乖雲端有皎
日其耀燭九垓一升高岡上再使鳳皇來
焦山東昇樓看雨

危闌瞰長江千里遠無岸際天見一白雲水光淩亂中如
界畫分濫漾久方判乃知結構初巧欲示竒觀鑿山架楹
軒縮地入几案悲風終古多濤石相擊扞晴猶風雨驚陰
或鬼神歎我來縱登臨釀酒日方旰初疑山作舟復訝帆
落雁冥：灌天地欲語不可贊平窺羲娥飛屢恐歲月晏
居常處塵寰百念雜冰炭焉知水閱川苦以身受絆波蘋
肆爭鬪名在骨已爛後來幾歔歔回首堪咲粲何如任天

遊清景供倩盼穿林携紅粧繞座發清彈天公亦好事飛
雨灑江半遙青忽無山怒點紛打幔大波車輪摧細響琴
筑散喧聲聒松楠颭影駭葭蕀境清神餘淒慮定物羣幻
轉思月出初水底萬珠璫清疑沁冰壺杳可涉銀漢山川
無不佳晴雨揔宜看推遷舟壑移佇立風景換平生幾兩
屐誓欲窮汗湧空隨著辟鷹屢作搶榆鷄閉門弄文章無
補等畫塲江山在眼中不去欲誰惋何時青行纏遍踏白
石研題詩付居僧濯筆藉長瀾

雜詩

朱絃奏瑤瑟蘭膏炳明鐙美人咲進酒觚爵從風騰短々
此百年哀樂苦不勝焉知壯士心中有一寸冰擲向明月

前寒光瑩秋稜四坐正康樂欲語誰與應可憐穿花蝶不
作脫辟鷹

郊行

春雲覆郊野晚日明復陰小車出城來細雨時在襟蒼莽
林野娛興至感忽深東風搖隴麥一碧無人音茫々此歲
華息々成古今世閒果誰人有髮得久黔新畬改故隴夏
木換春禽念此令躑躅愀然發孤吟

題覺羅方伯山水

方伯為先祖中丞公寫此横幅林木屋宇適如吾
家園但多溪山耳時當甲午乙未之交東事方棘
先祖官京尹而方伯為霸昌道相與聯事故自題有

戎馬風鶴之言踰年 先祖乞歸又四年庚子 先
祖薨於家夏秋閒京師大亂聯軍內犯時方伯已遷
直隸布政使遂死難於保陽夫庚子之變胎於戊戌
戊戌之變根於甲午國事反覆如環相尋而兩公始
末適當其閒七年中史事系焉因假畫發之以告治
國聞者方伯名廷雍字邵民名在玉牒多收藏名畫
自作山水肖王翬云

寫我園中竹蒼筤百千竿寫我園中樹修條上摩天寫我
園中居老屋茅三閒添我園中景一角溪與山吁嗟此畫
圖事變誠萬端我 祖昔京尹名聲趙張班時當甲午交
東夷兵氣纏羽檄落飛雪傳烽照甘泉朝徵車百兩暮賦

馬萬韉連營畿輔過隱：何聞：程書應王役衡石力所
肩憂勞變鬢髮歸夢滿正樊惟時覺羅公分巡屬官聯中
流舟楫共擊目風期存寫我故園色當我歸來篇中宵聽
風鶴題字心慨然此公實王孫天潢派遙源蟠根夾日月
玉牒黃金鈿貂有七葉珥祿有萬石頒平生喜翰墨購載
連輜輶大軸獸錦囊小軸金連錢深堂妙藏皮清閤如
嬖公餘弄煙墨奕々追耕煙諦觀此畫圖樹石清且敦汝
陽天人氣不事金粉妍所以中丞公契賞同澗槃東方
事既定遂挂神武冠入門輒然笑乃今見家園蒼筤圖中
竹搖綠到眼前蕭穆圖中樹修條巨如椽圖中三閒屋掃
壁散蝸涎圖中溪山色想像供坐眠身為圖中人樂此圖

中緣孤懷耿魏闕舊雨夢周旋惟時覺羅公承恩已三遷
昔為觀察使今也國北藩嗚呼七年中人事不可論自從
東戰罷憤激起茅管英才希虎變豪士棄魚釜陂成幾反
覆龍戰再黃玄可憐秉釣子弄國如轉丸未諳四夷性赤
手恃空拳其歲得庚子槐槍彗金鑾黃巾百千輩咲舞恣
神姦烈火燒葉街青天為之殷未聞擒胡月已見投長鞭
朝破唐沽營暮踐保陽堙羣夷夫致死怒甚左角蠻惟時
覺羅公保陽獨當關空城無斗粟戰士無寸弦飢疲卧道
路委肉餓膚餐顧此忠烈性刻著於肺腑登陴望敵騎敵
騎層雲填分知千秋期今日魂歸旋堂、天潢胄名在玉
牒編家頒萬石祿七葉珥貂連不能當承平奕世翔龍鸞

今為長宏血三載留碧鮮平生翰墨場寶繪羅星躔連錢
古獸錦有價黃金千不能當承平自載貫月船今隨秦人
火煨燼屋壁邊往時擅煙墨耕煙可追攀天人氣富貴樹
石畢精研不能當承平燕寢弄朱鉛今餘一幅紙貴作尺
璧傳其年春正月我祖亦蛻仙不覩禍患事超然風露
蟬兩公神明契去作上界官低頭俯人世碧海化為田西
巡望黃屋但見古長安回頭舊宮闕落日居庸懸家國事
慘：仙裾淚漣：令威華表鶴回翔一來觀我國幸無恙
我屋尚安全我竹捎青雲我樹鬱芊：我圖懸堂中鏤香
致明蠲我祖千歲後神歸亦安便我今展此畫去庚子
十年中情自潮涌百緒如尋環今皇勤訪落天人各開顏

周公思芻：皋稷贊平：朝廷九鼎定國勢泰山磐惜哉
兩公逝不來運陶甄嗟此一圖畫可作史事觀長歌罄始
末以告後世賢

長安贈李允卿四首

七日同舟車辛苦子與我賃舂解鞍轡隔巷望煙火子方
疲征途不謂我亦頗雉以文見罹蠶用絲自累龜俛強飲
食北土無一可

聞人談長安西嘆不可止未觀蒼龍關先見黃塵起滔
淩九天洶：塞雙耳塵中何所有下有千馬矢上有當路
人珊瑚冠紫貂珥

胡盧問長柄素衣化緇塵機雲不敢逃況乃非機雲我夢

江南水秋波浩無津白鷗拍兩翅浩蕩不可馴樊籠適自著已矣毋訖人

退之遊西京所與唯李觀哀歌賦車雲惻愴念憂患朱門多貴人般樂不知晏嗟此兩少年胡乃獨永歎士固不易知中腸車輪轉

次馮蒿庵中丞丈韻二首

以下壬子後

金陵去維揚道不及三百貪從君子遊千里猶不隔飛車一朝至俯啖江水窄升堂燈燭光巢鳥始安翩翩然復捨去颯若風掃跡云何太恣：烽火照江赤我行方未已公亦不安宅耳聆風鶴警默恐東南圻果聞天保郭已碎衝車石我還問蓬華黃耳喜相逆聞公白田歸三徑草盈尺

復尋海濱去遠就桃源僻高樓對藜牀阜帽長覆額今年
來白下故廨但虛白摩挲壁閒詩蝸篆壞煙液多生桑下
戀俯仰易驚魄可憐鏤舟求不悟流水昔彼哉草閒子往
者何茲々祝公強餐食陳蔡豈云厄

公詩飛將軍用一可當百弓彎猿已號矢發石不隔壁如
舞飛車水曲不厭窄回旋再盤辟勢掩九秋翮雕章已四
反草篆多鳥跡公年正七十几々雙鳥赤平生作霖期晚
歲草玄宅但餘圖書淫閒課花蕊坼紅塵醉夢地歌歎出
金石畢然逢古人絃指通莫逆我詩窘邊幅裁剪畏刀尺
蟲豸東野寒金鑄浪仙僻頗嗤頭戴笠未學黃點額賜書
極殷勤小戶強舉白公方五鼎食留秦列玕液反於羸蛤

內思取明月魄歐陽放頭地此事誠在昔想見淇奧人善
謔出咍燕羸師今恙出但恐剡藤兒

上巳日同人集城東上方寺東坡送李孝博處也次蘇韵

二首

閉戶如蟄蟲卷舌如寒蟬春風引我出適野謀蒼煙古剎
林杪踞風鈴韵層顛俯收綠野盡仰快澄霄懸升堂想其
人往矣峨眉仙熙豐彼何世江海寄此賢斷碣不復覩但
有洗筆泉僧殘泣龍象竹淨留婬娟歲月劇飛矢去人飄
以翩他年復陳跡茲會豈偶然

士窮豈不好有若含風蟬往時富貴人朽骨飛春煙英聲
塞九有高位換疾顛空留至愚謚永與日月懸嘉我二三

子滂浪皆斥仙偷吟意有得束手志已賢肯來修竹下洗
耳聽幽泉歸鞍載佳句正及初月娟相期蜩與鷺蒿下飛
翩：誰能擊九萬下視空蒼然

九月十三夜步月敬次家君韵

霜空寂無依孤月當自警何況月下人對此青燈耿開門
踏藻荇落葉動鼃黽廣衢無行人俯見兩三影怒鴉爭道
出驚雉圍煙靜想像華子遊心遠豈關境是中如皎月纖
翳貴當屏朔吹獨何聲金氣爾先秉

種薜荔

剗窗瞰虛壁反宇延餘光炎歊六月中畏景難走藏欲種
千挺竹巷狹不可行附壁有嘉植遺子或滿囊乘雨劇隙

土方冬擢新秧預想一年後翠幄如雲長几席瑩幽綠
簾衰清涼秋紅益可愛碎錦搖新霜蛇虺來結蟠隱蔽作
室堂我生猶戴盆終歲不見陽山精與木魅左右來獻攘
豈復畏汝輩陰姦為周防古來窈窕人蘿帶青霞裳高吟
九歌句一使千憂忘

送楊千里歸吳江

金行御天下八貴方雲興超然為鱸歸獨有一季鷹華亭
秋鶴聲臨難失回首猶勝潘安仁軋沒殉石友吾觀天下
好莫若江南山復愛江南人雪心冰肺腑君歸我胡留欲
去當竟去先人有清芬各掃松下墓長安傷心地離別不
足言萬里夫容國悠悠歸閉門

形神影三首

國以民為質民待禮義而後凝爾來紛々本末淪漸
故託陶生舊題以形喻民以影喻國以神喻道德為
贈荅明之世有君子哀吾此言中國尚猶有與
形贈

金石固銷泐膠漆有解時與子定何親相附兩不疑我行
子攸待責在安敢辭在醜無獨好蒙妍豈成俱但懼忝負
荷恒榦有時灾一淪黃泉底天壤貽汝嗤顛勉卒歡好暇
日相與期

影荅

無質何有情接構亦多役資爾為一身豈但相主客常顛

究光耀名成由善積勿令澌然盡百歲偕棄擲至心貢苦
言無聲淚暗滴奈何克君耳灌々終不繹居陽暫見求在
暗已掃跡罔兩伺我旁出入見煎逼久視固有方呼天豈
與直

神釋

生珠媚圓淵薪傳由繼火光景既無常四大豈不假嶷然
百年內所貴中有我金玉載滿車我御子乃馬途長負甚
重白日行已墮願保青松心歲暮長磊砢王喬可並壽松
子邀共坐勿效輕薄兒臨命矜婀娜羨魚宜結網厲德當
自果

雪

宵風吹凍雨，維霰颯然至。藹藹春氣交，輝輝衆形麗。廣庭肅以清，端居沖且閔。芳酒幸十千，塵書亦鱗次。常希袁安卧，且事君平棄。生故委匏懸，居情悅泥曳。飈嚴竹方響，靄淨松逾翠。持此歲寒期，請待陽春吹。

對雪懷濟南龍洞佛峪之遊

林園寂無聲，飛雪淹晨暮。璵璠似裝玉，空濛如集霧。靜對慮已澄，眇爾懷昔遇。凌兢陟龍洞，竄窳穿佛峪。濟南人呼此字音同

裕泓泉寒更潔，丹壁皓俱素。瀑懸千丈冰，峯負入雲樹。樵

歌久已斷，僧錫愁不去。捫霄撫羣山，銀海忽可渡。平生志

五嶽早歲輕，世務一與心。賞交向禽果，同趣

虎狐篇

有兒傍路啼猛虎銜使歸虎欲行仁義不知蹈殺機為我
往謂虎作計一何愚不觀南山顛綏有雄狐時伺汝
趨狐行前媚虎甯可共載不虎驕不肯言額但搖頭狐
慙撲朔去虎怒奮長驅虎落陷阱中狐來堂上居
韓孝女詩

鳳皇備五德不若烏雅仁鳳皇空自貴烏雅長苦貧翁姥
老無子贅壻哺其親門前市瓜果門內列陶甄辛勤潔供
養出入有二天壻如松附蘿女若葉糞根翁猝被沈疾迫
命不及晨呻吟呼弱女父今與鬼鄰孝女聞此語涕下如
綆緡旁皇入廚下其夜旁無人左手持歐刀霍色勝銀
割腹索肝葉不知肝所存引手探挈之腸出溢襦裙揮刀

力一割徑寸如園錢呼姊孰進父姊母始驚
睎街鄰高此義就視爭喧閨壘：九曲腸尚
挂衣帶間腹破亦不痛血不汙憑茵各合神
明膏醫養致安全問女家何在江都邑東關
問父何姓業陶者韓文田問壻復何人張郎
好少年生不知禮訓豈嘗誦書文媿：大布
服媿：鄉村民共和之六歲十月上旬作詩告
終古萬世歌其賢

華嚴閣上看雨

珠閣出香林登攀俯雲族茫：原上雨千里
盡春綠歸翻乍翻飛孤煙屢斷續山川坐成
阻延望多驚目江楓傷楚心小戎念秦屋不
藉虎溪鐘云何息心曲

寄荅沈太侔

幽燕多烈風歲月慘將暮旅食冬若春修晷不可度出亦
無所遊入亦無所語生死文字中何救玄髮素富貴有人
籍貧賤無天顧杜微面授札實以葛公故許丞罷見逐黃
霸籍調護太伴病聲當時無斯人驥駉勞窘步時從賣掾飲一
與公子遇哀歌燕市中羨罵者相互子其甯爾心霜雪亦
何懼

示何穎虎

昔我居里閭及子嚴君遊泊我超京華相得益綢繆我歸
子君送執手立中道誰云生死別自此逝不留承問中剝
割北望心若抽郢匠失壘鼻牙絃寢高齋時發宵夢夢
上城東樓茲樓子君在我往日十周十周亦不厭欲去反

遲迢其時子尚幼冠未加尋收爭墓論瓜葛折齒啖為牛
驚寤忽隔世突弁美且脩俊如九秋鷹霜翻始脫鞢快如
千里馬未肯顧轡鞅龍淵腹雷雨武庫森戈矛子君實文
雅得子剛諧柔問子來何為不語啖掉頭刈葵勿放手負
薪勿反裘丈夫自有志旁人但咿嘵子門表通德子祖擁
八駟非唯極貴盛孝弟無匹儔紫荆自重花冰鯉供珍饈
分宅取其小隘不容車輶弟即子林祖為人亦清修深居
課奴婢田舍躬問求子婦訊起居歡啖解百憂為子語舊
事美於獲琅璆子年雖尚少繩武志必售幸憂名不立勿
謂貧可羞暑退秋氣好酒尊容泛浮揚州一時月喚取鳴
箏搗我拙百無用避事等避仇自從子君喪霜髮日向秋

見子則大喜俄思淚盈眸恨不將此淚哭上宿草以愛子
語故長請為舉其尤一願安沈潛二毋愧明幽

春集贈許蓉牀

元化猶逆旅既來孰不歸條風扇新節餘寒歟無依嚶々
時鳥吟灼々初卉菲臨川仰前歎春色盈我衣寄身萬物
中兩遣欣與悲但願一尊酒清言逐觴揮之子溫令姿淵
谷媚潛輝醞藉若有餘守沖在音稀一世方狂馳相與解
服駢儻遇溫雪子目存理豈違

許蓉牀以遊無錫詩見示用唐人宿慧山韻三首荅之
君尋錫山去欲訪東林人東林不可見舊俗化為新幸餘
青山在娟靚獨不磷脩蛾拂湖鏡倩咲褰風塵春晚梅尚

花香雪映青旻誅茅可以老但恨居無鄰

具區三萬頃氣與天青蒼朱闌轉龜渚攬勝在一堂疊浪
無始終日月兩若翔茫：送人代浩：吞空光燕處者超
然下簾靜焚香魚龍夕飈怒境對心已忘

浮屠昔忘情獨戀桑下樾三宿太湖濱漁唱聲未絕回頭
九龍山夕照鳥明滅慧麓醒宿酒瓜洲見新月詩隨境徘徊
興與心超發待余衆糧遊期訪君車轍
代夏友柏贈鄭陶齋

我聞抱朴子其師為鄭君口授金碧訣身佩豁落文夫君
豈苗裔千載傳清芬珠江出明月光掩天中輪十五學擊
劍英風流海濱二十事商賈意與弦高羣懸軍交趾外手

扶南訛氛樓船百萬斛鬱若翔雲鷗一：部勒之遵海達
析津彭公古人傑一見歡無倫方將制六合欲倚收奇勲
奇勲竟不就骯髒七尺身空陳濟時榮痛哭干高旻爾來
六十載霜髮日以新羣龍沸中野孤鳳栖荒榛時：聞雞
舞老矣非劉琨納手卧大匠咲彼血指痕四海如亂麻一
身念歸根蕭然理初服韶石將上賓燒丹白雲際避世盧
敖親我從萬夫子塞兌養道真君來一握手言咲兩殷勤
辟如幽蘭花清風發其薰同登牯牛嶺解榻連晨昏我獨
扶雙屐穿雲踏嶙峋俯漱瀑布水仰裛香鑪馥絃琴綠蘿
幄星斗翠可捫恨君不來共妙理與誰云此事復三年念
之斷人魂萬君已脫屣墓草碧可耘何況彼彭公箕尾粲

天門人世一夢幻興亡兩如蟲憂來恐天醉樂則物皆春
我如魏王瓠五石不中樽君猶老子龍隱現出無垠神仙
與豪傑自古非異身請留穀城石然後入青雲

和因是子詩五首

蔣君維喬自號因是子靜坐有得嘗著為書末附詠
懷五首語甚高妙余每誦輒為听然近棄官入天姥
為僧尤驚其勇決因取其詩逐韵和之但以寄意不

必示蔣

此君實不出
家後乃知之

有生逐形器一著不能遷流浪大化中孰知幾何年生
盡復爾蜩甲隨化宣達人解斯會脩然息其肩雖懷蘭膏
質終焉謝焚煎挂冠神武前解龜去纏牽死生自茲一甯

但辭華鮮地遠涉江海形超返自然水清月始見無適非
真圓尺璧猶可棄髮膚誠所捐啖謝當路子鳶魚非一天
四海雖目營五嶽久有志蒼然顧周京彼黍成稷穗兼濟
苟未能獨善亦其次朝披鏡湖雲暝上天姥寺雲梯鮮人
跡李白空夢至慨然思古賢千載猶一致登彼萬仞峯了
此一大事成佛或未然於焉恣吾意

未來吾不億既去吾不思思億忽然斷安識即與離君看
山下石多作墓上碑正由一念誤死蜚黏枯枝寶珠繫衣
中恍忽不自知昭々一有悟去々從所之豈能逐夸毗談
啖事抵巇身名有終盡富貴在一時古來豪傑士或復不
如茲

陰蟲鳴草閒。感：相啾唧。雲鵬負青天。九萬一何疾。春榮
咲松姿。霜厲憂槿質。塵網弥九垓。婉孌誰肯逸。飄然升雲
根。永與世相失。瑩泉可鑑心。苔壁可容膝。從茲晏坐去。萬
劫如一日。香花禮威音。煙駕上兜率。憑風睇人間。白日慘
蕭瑟。心兵競蜂屯。澤死猶蕉密。宏我六度情。方同發緯恤。
嗟余偃蹇姿。三徑卧松菊。於世雖寡營。在道甯發覆。多聞
失無漏。雕華屢傷樸。青：霜雪中羨彼松柏。獨南鄰晝聞
歌。北里夜復哭。古今遞相逐。逝若鳥過目。夸權誠已愚。矜
名得無恧。相去膚寸閒。安足論羸縮。未若乘天倪。優遊鼓
其腹。誦君靜坐書。往者已三復。跛鼈困坎井。白駒睠空谷。
物外有真常人閒。幾涼燠。願持苔帚倡共理。伽黎服。

雜興二首

盛夏惟六月炎歊何蘊蒸清秋自西至天地忽然澄戎車
動畿輔薄海皆軍興鼓角地中響梯衝雲半升勝者熱可
災敗者如消冰然復誰子蕭條秋後蠅黃雀哀莊辛由
來互相承西風動地起厲翮懷霜鷹狐兔滿草間一擊恐
不勝二公正分陝七貴方驤騰

絳綰一淒其繁華忽然素際海起涼風傾天浩零露亭々
青蓮房特立獨不懼雖微老成姿黽勉向遲暮蒨葦中自
苦籩人以為御

始蓄鬚

秋聲動天來秋氣感人骨颼々林表葉蕭々鏡中髮無聞

聖所歎飽食負日月于思繞涿居蓄之聽其出顧無老成
姿逝與少年別功名甯我希歡娛亦囊括方將入雲峯掃
地事禪悅朝同烏鳥興夕共蛇虎窟星々兩顧下千歲盡
如雪家來訪其人音形已變滅此期如未果且與酒檮杌
素宏詩時與酒檮杌
則檮杌動詞也
大雪後登南城樓

風御追列遊瑤臺覽姬轍區中誠迫隘象外期超忽登頓
凌巖飈長嘯俯積雪平林藹如畫千門靜猶閉
六朝人此
字例入仄

韻

雲空合沆寥川陸窮委折大哉天地中何物不皎潔
喧伏聲形晶輝朗毛髮膠舟近浦卧寒峯限江列集虛神
已超觀徼理無缺蜉蝣一生內癯肥戰方烈藐姑孰同升

諸梁可忘熱陳詩附飛鳥遺彼世外哲

先母夫人二十周諱日作

風崖無靜樹奔軌豈回輶慈母棄我去俯仰二十周几
筵設茲旦往跡恍未道優焉竟無聞哀我志實偷淒飈承
櫪發素雪正紛流神凝感嚴淨精鍛洞冥幽魚蒜雖已薄
賓佐亦莫酬年少失自立四十今白頭譽名何足言但懼
多悔尤涉世如舟虛飭性比轡柔庶將奉茲義含啖禮舊
正腹我何所望投杼願貽羞慄然撫孱影愴悵安可收
辛酉暑中家君偕許冰盦丈諸公為消夏會旅酬之次
小子與焉成詩十章殿之卷尾
四海日波蕩此州幸清安尚容持尊酒長日相盤桓鳴蟬

在高樹不受金丸彈豈無憂生意嘯：永夕歎

世變雖多端親年則可喜老父七六翁黑髮仍兒齒時

時招近局蒼然半黃綺亦有諸少年見我羨不止

許公得莊理自號全酒翁蒼髯豐兩頰談笑生英風料子

似微子

謝混稱宏微為微子

詩與人並沖黃山煙霧外赤壁畫圖中

謝傳東山居阮公北湖屋桑麻人愛敬況乃諸孫屬扶杖

偶入城酣歌日不足歸還擁賜書酬我南面福

夾漳張在南今也居道北家人一千指臺榭繞花石人驚

平地中有此神仙宅誰知萬石君數馬長舉策

渭陽英妙日萬里觀滄溟避地今十載尚餘雙鬢青草書

有猶子妙奪換鶯經肯擬撒鹽句定應如謝庭

李侯長者倫早得法界趣奉母日循陔焚香長閉戶彼哉
繁華子箏笛酣朝暮試一訪君家經聲在深樹
舟壑人所嗟金商今屆節消暑暑已徂脫木如脫髮我觀
三世空過未無可說一咲對酒杯心光煥然發
今年願止酒亦復罷作詩引杯忽然盡牽率成此詞是身
若波浪隨逐信所宜已秋而願夏哀哉古人癡
皇天一月雨萬族化為魚我生何福德醉飽反踟躕既不
出世閒安得免歎吁餘生幸拾得不敢怨泥塗

謝村願弟贈松禪遺製筆

昔人論太平推美及工技時衰文事歇人苟藝能墜剡藤
薄蟬翼黟墨踈不綴咄哉中書公年老失位次開緘驚絕

倒松禪有遺製回首二十年拊几一流涕匡扶則未能忠
雅有深致山林晚放逸邦國俄殍瘁良工存者誰遺法妙
能嗣想當畫日時筆力破餘地中繩存正直垂露見圓銳
大手今則無見麟空掩袂嗟余翰墨場顛倒早酣恣字矜
蛇蚓結文逞纂組麗恒憂退筆冤對此敢嘗試累之十襲
綈置在五經笥庶持內愧心少贖少時罪干戈民蕩析寓
縣日羹沸青氈未必保況乃秋毫細深藏誠甚愚暫玩聊
可味吾弟妙作書書有季海勢雖無鳳樓修得此足快意
胡為乃分我虛棄茲大惠人書老有時竢寫金經字
九日詣文峯塔塔新修復人壅不得登

積基一丹腹照爛損殊觀亭：千尺霞矗此城南端羣情

樂佳節登高俯清瀾
飄裾碧雲半蟻積緣
闌干何止顚既
恆昌丰誠可歡何必
躋雲梯然後振羽翰
斜照在中幘風
鈴韵高寒誰如高岑
者携手共盤桓

煎茶

嚴風灑急雪日暮窗扉寒
垂帷熾炎炭列坐且為歡
茗色剖嘉茗擢秀自靈山
遠蒙方外友擷寄青雲端
黛色裛煙露雲腴滋肺肝
汲泉試烹煮蕭々響哀湍
且酌亦且飲恬暢四體寬
方知人世內取足誠無難
云何肉食子豚羔臠銅盤
貪此甘醲好忘彼哀鳴酸
已矣勿復言蔬水可自安

遊栖霞山三首

晨發揚子津暝達孤樹驛
山行不見山月落夜深黑
意行

阡陌中草往紆復仄明燈叩寺門深翠動呼吸暫憩行李
勞解帶歡食息晨烹入窗戶俯見峯影直遂躋千佛巖衆
象妙雕刻垂蘿綴珠纓芳蘚繡衣襪烏珠豈能燬紅巾安
敢驅前行勢踰峻松石密如織仰闕皆蔚翳傍眺咸削劣
日光被四山煙靄互蒼赭杖策不期遙勝境紛可即

三峯共一幹中者千佛峯我穿中峯背遂落西峯東境幽
石逾秀竊厯無人蹤泓泉穴山腹其內藏蛟龍終年但深
卧雲雨非吾功花澗出其下水激春濛濛疑從白雲外隱
與仙源通境異情已適山虛心益空適然息藜杖宴坐休
微躬鬱々天開巖斧削如鬼工題字徧苔壁剝落紛青紅
捫葛理既絕梯雲誰敢從花鷹獨試翮下掠青崖松

東尋春雨橋西翫珠泉山中經再宿遇勝皆流連仰觀
三茅宮鳥道出半天振衣陟其半大江橫我前勇進畏落
日却行下蒼煙山容晚益妙微月初張弦憇石挹春澗橫
琴弄幽絃巖靜星更白風定籟始喧緬懷明徵君捨宅何
其賢千秋迭興廢經始名歸然故人烏目僧妙得文字禪
破衲掃荒翳雲構雄且堅化終人亦往矯首驚徂川嗟我
已華髮逝止當隨緣常咲向子平苦為昏嫁牽茲山可結
屋石隱甘終年

傷包綬伯

斯人忽云逝往事方如昨攜手遊東田歡言摘紅藥適館
突未黔書來驚病作賴有賢主人辛勤理饘索生無一錫

產未死曾何樂獨恨方寸心奄然付冥漠暑雲蒸長川歸
樞邈遙薄問死不及尸俯仰深驚忤兒子昔從遊負書方
北角南軒嘯歌處舊竹生新籜入室想音形撫境悲零落
回首問孤惇交遊幾京洛

為程伯臧悼其姬人

君居九江頭妾居秦淮側淮水似柔腸寸寸割秋碧妾居
秦淮側君居九江頭三朝戴星返血淚添江流烏啼金井
風月黑星爛嬌兒劍在旁角枕一何粲愁人難為睡孤
宦難為依念昔纏綿語買山期共歸不作買山歸翻成買
山葬轅馬廐淮橋五步一惆悵

投兵行

甲子七月黃旅將發崑山瀕行捉民為兵作詩以哀其事

羽檄如流星角聲吹滿城居人爭走匿空屋唯雞鳴借問此何為軍符急點兵健兒捉羸弱迫若鳩遇鷹工者釋斧斤農者輟其耕妻兒攔道哭頓踣相排傾戰事非素習安能事戎旌臨發心已死奚待聞鼓鉦朝發瓜洲渡暮向崑山營登艫一長慟微命甘自輕委身赴洪流洪流或有情載我全尸歸識我家人迎軍興固有律召募亦有程誰能驅赤子鋒鏑強所撓悠々仰蒼昊憤々難為平

秋懷五首

閒居忘四時不知歲月逼適看玄鳥來翩去復矯翮涼颼

中夜興商氣茲蕩滈騷：入中閨索：竟長陌擁衾起驚
聽吾生信久役大化如舟車人生猶旅客滔：運載去一
往安可跡樹葉日以黃顛髮日以白茲事古共然微軀為
誰惜

朝蠅何營：暮蠹何擾：金方奮刑威一去跡如掃蠻觸
自言強蜉蝣自言好登高望九州古事滿懷抱：山上
墳青：道邊草英雄安在哉骨朽魂亦槁當其得意時山
嶽為傾倒云何當世士錐刀自縈繞投身湯火中千喪不
一懊苦縣有至人知止以為寶

嚴霜下幽薊燕雁起高翔十：將五：零落不成行哀鳴
徹修夜飢迫多所傷豈不懷飽煖將往江南鄉江南新戰

罷空畝無栖糧白骨纏蔓草縱橫如積霜為我謂汝雁慎
毋啄人腸雁請肥對言我家亦流亡風塵滿天地何適非
栖皇不見渝關外兵氣方淫淫
曠哉茲世中久矣無所娛閉關絕人事頗似山澤居方宅
三五畝古木八九株秋花羅紫翠映我琴與書五嶽雖未
遊七貴幸已疏揚州繁華地英俊盈通衢暮投倡家宿朝
入府中趨捭闔杯酒閒巧言勝笙竽甚竄且塵上去去非
吾圖矯首秋天雲濯足清水渠
浮雲歸暮山白日行已晡靈舒升東阿光景何湫湫流輝
入曲房引手不可攬天高衣裳寒夜久霜露慘欲言誰為
和展轉思荏苒塵琴在東箱聊鼓寄余感操心莫如虛勝

已莫如歛世故雖多端御之以不敢殷勤除害馬勉強味
苦欖尻輪遊八荒何情異流坎已矣古之人德輝期共覽
放客所贈蟹

鄭公釋官禮巧入蟹胥名反愧南朝士將糖愴門生西風
紅稻熟湖蕪連宵盈苞苴遠將致煦沫當中庭投戈屈八
跪點漆愁雙睛生死寄呼吸念之令骨驚剛強豈足恃奈
何獨橫行蠲我一餐味贖爾五鼎烹投之清泠淵郭索多
歡情有生迭相禪乘化偶異形求生既吾願司殺甯敢輕
嗟：江南戰人血飛為螢

柳子厚生四十七耳余今年正四十七歲首買得柳詩集
因題其端

明月不隱曜豈能無暗投
一朝火玉石俱不收竄身楚南裔猿鳥同啾啾
蕙芳發幽篁冰碧恣沿浮
青靡誠可遺浩蕩極天遊
遐追湘纍詠眇默鏗琅璆
脩門竟不返羅池空見留
餘微炳竹素尚友生
古愁撫年旣已齊
問業曾未修
願紉荃蘭佩
夢想結綢繆
君如鍛翮鸞
我如媚川虬
隱顯理旣絕
鳬鶴互所優
儻期南山柏
霜雪老白頭

蠶娘歎

二月桑葉圓團
如綠錢倉庚喚蠶娘
鳴繞桑樹間
三月葉如掌
吳蠶始三眠
四月風氣煖
蠕蠕爭上山
舉言問蠶娘
何事閨中藏
春中不浴種
春暮不采桑
非妾不采桑
桑

苗故不長白馬門外來起：馬上郎引手擢桑本根葉委
路旁就我求酒飲啁我紅羅裳年：大養蠶繅絲日盈抱
一家賣新絲十家衣紵縞今年閒十指坐視春陽老一家
廢蠶事八口憂飢飭一春失蠶時歲暮將焉如請看營中
兵多於機中女豈但賦無衣行憂餒豺虎
登平山堂追念包綬伯及從弟林顗皆嘗於此養痾一年
中並歿

春服乘和風青山秀芳甸依：谷林跡兩載缺登踐緣源
路始窮躋石情未倦風鈴響一山遂謁松下殿名泉自往
昔井幕荒幽篁竄慙感素心寒瑩鑑人面呀鳥歡暄節微
香通梅援養痾念伊人徂謝俄後先書窗尚茶竈苔壁多

蝸篆分手豈前期傳舍驚流電浮生信虛妄春榮空照絢
終理居士裝挽蔬共僧飯

乙丑九月一日夜作

地醜兵益多暫觸即生亂星火致燎原稽天起微瀾名城
養驕將敲扑非衛扞主客一紛拏權家適陰扇軍書中夜
至驟發逾急電喧：捉丁夫颯：響矛積大家驚閉門小
家走藏竄皆言此胡為於何可逃難悠：乎蒼天月落不
肯旦我時亦披衣撫枕獨長歎兵民不兩存如虎豈人伴
養癰肌肉閒不割亦終爛愧乏高蹈姿淪胥安所適時乎
有反覆佳兵豈屢觀不見長平阬一夕四十萬雖云四十
萬黔首已塗炭

從軍行五首

蒼鷹飛食肉萬里不念家啾、飢雀羣亦失守故槎中原
日格鬥兵勢方紛拏樹羽急占募村、鳴鼓拊軍吏巧言
語要我 就擇差稱我好身手佩我雙箭靫不見東鄰子貂
裘斑虎韉一戰受上賞再戰擁高牙嗟我實貧子井稅日
有加不去憂餒死去即委虎蛇勉強從吏言回別母與著
戰死亦已耳生當返耰耜

行旅日以遠去家長苦愁軍中異耳目所向多驚憂步應
金鼓行身與牛馬伴荒原正落日悲風響修、掘壕野田
中放哨前林陬嚴更噤霜月四體僵不柔路經新戰場白
骨壅道周由來征行士有命實不猶飛鳥戀舊巢狐死必

首正哀哉故鄉侶不復同白頭
小邑生蒿萊大邑門不開軍興愁仰給刮地無遺財主將
怒未已飛書急風雷黃標插白鏑駱驛連車來古言從軍
樂韶錦照輿臺云何帳下士瑟縮如寒灰糠粃不充腸敝
緼不掩骸驅我於死地俾我身虺隤矯首問主將多金安
用哉飢軍不可戰戰亦不復回
從軍有苦樂貧薄安敢呵但問七尺身為誰行負戈登高
望中原雲物美且和四海盡兄弟侵伐理則那放廢一何
怨啜羹一何頗晨朝發江介夕宿次淮河紛々望敵騎隱
見長林阿鳴礮如雷音彈若白雨過令嚴在必克急鼓不
輟槓叶男兒在沙場之死矢靡他但懼非敵愾殺戮安敢

多投身試一擊納手私委蛇
營屯既相偏斥候日不閒清晨望偵騎三五遙山閒引鉞
未忍發遲回出林端眉目稍可辨乃我鄉里歡失聲呼其
名縱轡至我前握手未得語涕下交沅瀾兵凶戰危事性命
輕茅管奈何去鄉井為人爭勢權互脫韎韐裝挂著高
樹顛丈夫甯餓死焉能自相殘同伍聞此事各謂我賢
紛然放兵仗一散如崩山

對庭梅憶鄧尉之勝

余意在名山居閒情轉駛況茲青陽節復值芳華美庭梅
何朶々數樹交窗几日映愈煙緜風回乍飄灑

此字廣韵
四紙收

提壺念仙侶莫遠誠具邇遙々鄧尉山葱蒨如尺咫虬枝

徧苔壁複澗深霞綺花明嵐翠中香流白雲裏林梢遠明
滅知是太湖水曠輿境已兼遊歌情所止邈矣禽尚遊竭
來鷓鴣子

涼意自何來

涼意自何來炎威向何去脩然一夜中尋之了無處明燈
對幽窗照見竹閒露遙河星影淡高樹風聲聚稍欣笙簟
滑行慨玄髮素代謝古共然吾甯怨遲暮

偶學香山體

塵外小園居秋初好天氣幸當身少病兼值心無事苦茗
拆封煎梵經隨手記起戴白紗巾閒步青苔地風涼鴻欲
度露下蟬多思籬豆白花菲階蘭晚香細行依松樹坐倦

即藤牀睡年在健衰閒情忘是非際除却樂天翁誰能知
此味

出東城值驟雨登福城閣俄而朗霽

朝隄在東野雲氣方潭々飄風鼓之西如馬脫重銜雨來
隄上樹煙沒蘆中菴殷雷助滂淖萬竅聲俱酣超寺陟香
閣茫々俯江帆青霄忽褰霽白日當正南高下明綠疇向
背分晴嵐朗然疑夢覺餘溼盈衣衫動竊理豈異夷險情
可探如幻在即事緣生非妄談回身禮彌勒永願茲同龕
追懷陳大燈

仙人東方生雲海恣浩蕩偶來戲人間夫豈就羈鞅君生
千載後抗跡追跌宕啖携兩如花酣歌發高唱下筆輒萬

言飛行絕依傍談嘲四座傾若脫玉卮當我時耽鞠檠逢
子相張王九衢霜月高醉步踏銀浪今來久斷飲勝事惜
疇曩何況對酒人墳松已盈丈昔君鄴中日最友五官將
及乎洪憲初關門矢高亢才華世易識貞固孰能尚卑官
樂長飢人世久相忘嗟余寡交友往者各凋喪來者復何
人餘生付悽愴

寶城看菊花

夕陽多古情蒼莽與心會徘徊蜀岡曲延步宋城外霜林
隨去深夾耳響竽籟林盡數人家茅茨映荒蒼雞聲出喬
木籬落相掩帶居人悉花傭生理亦可愛霜風一披拂黃
紫紛綺繪養此高世姿意與箕濮對踟躕理歸榮俯仰眺

煙靄遙々江上峯三兩出牛背請謝義熙人拂衣可同載

卞公弢宰績溪歸但携菖蒲卷石為之作詠

以下丁卯後

君為績溪令但飲績溪水溪水終古清吾心亦如此地僻
欣俗淳官閒知政美奈何河上師紛漬若螽蟻騷々十萬
衆徵索到雞豕父老哀長官黽勉強供擬慨然投劾去甯
但折肱恥朝從輦嶺度暮向鳩茲止歸裝問何有含咲指
案几蒼然澗中蒲映以石磊々移來自天都作供登栗里
何慙鬱林守真似猗玗子他年九節根服食養精髓便逐
九疑仙往來嵩嶽裏

何蕃

何蕃立太學不獻賦泚諛豈殊太尉笏英風激頑奴鮑宣

昔得罪嵇康方見誅
詣闕競舉幡叩閣爭上書
亮節誠所高
血氣稍已踰
白壁易為玷
蓬麻誰為扶
陰姦見之喜
滕舌來相驅
用爾作喉舌
資爾為耘鋤
爾不自覺悟
歡然如附塗
狂藥醉爾性
畀狗獻爾軀
東閣廢六藝
終朝但狂呼
裂冕而毀冠
躁擾猿狙如
自云童汪錡
誓死不顧餘
一朝事反覆
膚髮填溝渠
當時驅汝人
安坐嘆爾愚
哀哉為此禍
豈曰命矣夫
張儉走望門
夏馥行剪鬚
范滂攬轡死
申屠因樹居
明黨安可為
禍福信有樞
奈何為虎俵
自以身前趨
吾顧執此虎
寢皮啖其腴
蒼穹甚正直
孩孺誠無辜

贈王陶民四首

幽居心無事
晨夜諷道言
非敢避世人
實畏諸少年
秋苔

積深巷黃葉墮其間忽值素心侶歡然來款門
君住覽湖濱湖水繞門綠伯仲美聲華蕭然但初服霞天
雁聲遠煙浦漁歌續弄筆向菰蘆伊人信如玉
朝挂下阿帆夕飲蕪城酒百里何所逢西風響衰柳禾熟
穫人稀村荒兵亂久北雁一相聞故人今在否
早無經世志雅好在雲山淹留未成去落魄凋朱顏聞子
擅煙墨荆關如可攀試寫石上月相期霞外歡

田家三首

閒：桑下牛粥：場上雞場上遺粟多田父寒無衣我行
應阡陌日薄氣慘悽丁壯垂首立童稚當門啼野老起告
余生理那可稽今年雨暘若稻穗盈溝畦小戶滿抱歸大

戶廩可梯俱言賴天眷庶已免渴飢誰謂事乖舛穀貨價
不齊任糴一石粟未足一幅衣君看蠶盎內豈復有餘遺
聞此意愴怳佇立頭為低兵火滿川澤追逋密如篋朝
下縣帖夜：無安栖征商商已貧重農農反疲吾生未自
保對此增涕洟嗟：喪亂世何以為烝黎

老農踰八十閱世頗多端身無一馬地賴種主人田春耕
汗濡體秋穫如雲屯分餘及家室衣食藉飽溫主謝客良
苦客云主人恩歡欣誓相保永願終百年昨有少年子翩
翩來我門口講指復畫客主理不然教我勿納粟誘我起
爭喧駭汗聞此語茫然內憂煩憶昔洪與楊亂不及田間
奈何教人叛此豈殊心肝還顧謂兒子此事不足論力耕

汝曹事守分甯無天

行々向田家日晚期寄宿蝸廬荒翳中既黑未明燭傍垣
栽蒺藜當戶推礪碌借問何以然含悲向余告前時兩軍
戰礮石碎茅屋後時潰兵來搜掠到絲粟皇天全性命幸
值秋大熟奈何椎埋輩出沒徧川陸手兵非棘矜身衣悉
戎服公然刼丁口百溢方論贖身無五穀皮安敢遭指目
君聽前後村哀々夜深哭微軀豈足惜一失肝我肉
焦公洞圖為蕭畏之題

人隱此山中山更隱江裏煙濤世久隔肯為鶴書起往昔
有焦公今來得蕭子寒巖鑑心跡相印兩如水披榛入荒
煙步々想遺趾崖偏風益高徑反去未已歸歸古仙人班

荆對石几風塵久龍戰吾亦欲終此且願長避人未願長不死

題王二水畫松鼠

攬身樛木顛欲下目炯炯畫師爾何人乃寫鼠輩影霜林無隱枝是汝技窮時技窮孰勿赦但勿妨我杜讀書

羸秦昔得意六籍盡焚如誰知圯橋上自有火外書伏勝既口傳孔鮒亦壁儲至今天壤間粲若春華敷束髮誦聖文垂白習未祛艱哉值今日斯道方泥塗與世幸背馳適已聊有餘晨朝把書坐抵暮猶呶唔清風生我側啼鳥為我娛飢來或忘飯燭跋亦未劬超然離世閒安知我誰歟

但恨少同好，應若笙與竽。寥々望千載，搔首起踟躕。
對雨

騷々一叢竹，榮々兩梧桐。涼風與疏雨，竟日半窗中。
處寂
慮雖淡，懷秋思無窮。非將六如倡，何以慰憂忡。

招隱寺懷戴公

久欣招隱佳，背郭情已悅。春山易懷煙，蒼秀不可說。行々
向空翠，微溼在中韞。幽花塵外明，新泉苔上活。峯回得古
寺，人境益寥泝。齋鐘沈午音，鳥聲滿林樾。地幽悅嘉遯，往
跡如可掇。五絃揮松風，餘響了未闕。新亭鑿巖腹，正對兩
山缺。飄然北固雲，飛來在門闥。江隨天一色，鳥與帆滅沒。
弔古情已悽，憑高思轉豁。緬懷江左際，易姓若旒綴。世胄

與國華淵儉爾何物惟公繼通隱奕世秉高節名雖感時
君終然卧巖穴嗟余山水好久矣輕華閼先人晚焚魚
世變甘采薇明夷運未已蠱上事可決終期孺仲兒蓬頭
弄雲月

詠木芙蓉

金商入園林風色滿高樹枯荷緣沼折敗葉當階聚亭
木芙蓉孤立獨不懼紅粧結翠羽照影時自顧嫣然風霜
中豈復怨遲暮佳人昔同好浩蕩隔雲路采葺用自貽今
年寒太遽

出東城渡河有西域先賢哈普丁祠墓地高塏而幽邃宜
於遊觀祔葬者數人左公寶貴在焉公蓋回部人也中

日之役飛礮碎公右臂猶大呼曰今真左寶貴矣乃踣
懼後世不知其事與墓之所在因為作詩時俄羅斯兵
方犯遼土

祆祠出城東蒼：見高樹朝陽河上明一葦欣可度香臺
入門湧澄石引幽步纍：四五墳石榑堅紵絮蒼苔寒亦
積飢鳥噪頻聚霜風拂人冠黃葉下無數堂：左將軍往
者戰何怒張驄雷火中子辟仍大呼市朝今已改英魄豈
來寓晚俗賤忠貞畸人獨餘慕神傷感幽閨俯仰增百慮
回首松花江胡塵復南竊

中泠泉懷故太守王公仁堪

名泉自江心何年出平陸窈窕白石闌風漪散文縠當時

王太守作吏潔如玉班春朱兩轡往々就林麓
疏池貯澄碧築榭倚花木到今比甘棠愛護不
忍觸我來早春際林意染微綠惜々懷昔賢步
々仰遺躅呼童具瓶綆茶臼出深竹一薦水仙
祠甯歌隱之曲

荅周惺庵兼呈李審言丈

朝樹鳥聲美綠陰清夏初新苔淨行跡穆若
深巖居之子枉芳訊把函情為舒連翩八九紙
意重瓊華琚上言讀書樂下言惜居諸近從李
先生直上龍門趨成章幸有斐晞驥甯非徒復
傳先生言念子詩可娛將呼剡溪櫂一訪班
生廬聞此意忽恍子書甯誤歟先生實名德九
牧所稱譽六經與百氏隋掌皆明珠餘事為文
章含吐庾與徐奈何

雌霓辨處欲高軒，紆韡生無行業況。又值秦餘久忘楓落，
句自把種瓜鋤平也。昔席門門有長者車，琳也鄴中客無
豪於小巫家。風慙曩賢仰止徒區區，開我竹下亭掃我花
閒途。安我烏皮几，置我尊與壺。先生時未來，來想色敷愉。
書如黃石授輿用，門生昇

八月十九夜對月

三正有更迭，歲月吾今暮。秋宵異春夕，里巷喧華燈。和萬
唱者千浩若，秋濤崩幽栖。黯愁寂欲語，誰余應。賴此空海
月，升輝正澄々。窺簾一澗漾，入竹紛翳鬢。照我幽獨影，微
吟荅蒼蠅。不照踏歌地，連辟香風騰。哀樂與世殊，爾我可
與朋徘徊。回憶相顧歲暮行，堅冰

不得陳子礪先生消息十九年頃乃知其以黃冠歿於羅
浮矣悲歎之餘因為此什

石鑿寤次律金臺待清臣從來神仙侶多出忠孝人今古
一螻蟻變滅同悲辛周宗況板蕩麥秀餘酸呻夫子九仙
骨中年偶朝紳契闊十九載音書無寸鱗或云浮海去又
說潛鄉杓安知羅浮頂采藥遺其身未必果學仙孤往貴
絕鄰竒峯陟四百啞虎隨逡巡登高望九州故國推為薪
蒼然一長慟委蛻辭風塵時俗輕故老聞之何戚欣獨餘
老弟子哭寢悲風振恨不一長鑱給使窮秋春公追稚川
子我亦義皇民

送唐氏妹返葬武林

惻々向正首曰歸在今茲晨興入古寺衆鳥驚人飛孤櫬
委荒屋蛛網蒙翳之甯親昔雙返獨往今誰依江帆挂西
風遣真從此辭童奴載裝送夫壻自厓歸既嫁則生男嘉
會似汝稀奈何命不融當華而反萎母家日以遠魂返不
可知女生鮮令淋念汝增百悲何時虎林阡濁酒澆棠梨
歸看汝稚子甯憶母為誰

裝潢家壁上見伍范寫山水甚工有生於庚子印記不知
其人悵然懷之

並世間山川異世邈霄漢聞絃知雅意精神可相貫壁間
此新圖巖壑何爛漫重嵐鬱森沈霜木互淩亂麻皮縱橫
皴墨點風雨散仙人黃鶴翁逸翮疑可喚姓名宛堪識誰

辨鄉與閑君生西狩年七十殊未半想當弄筆時揮灑不
停腕焉知賞心客相對勞瘁歎煙雲見襟期翰墨紛咲粲
已結邱壑緣班荆不嫌緩

送王林涵遊燕

蓮沼脫紅衣槐庭結秋響商氣感人心耳目一悽愴洪流
洞淮海人少新鬼多居人尚愁歎行子將如何藤笈白蕉
衫落日千里道西山馬上明空翠不可掃九門詖蕩、雙
闕排雲煙為我弔黍離一往二十年魚尾日以頽龜毛豈
勝刮尚照新少年空憐舊明月登高已能賦勞者況宜歌
好作今樂府時、寄衍波

朱菊坪歸自莫干山賦此奉簡

別日蟬始鳴歸來菊將把飄忽若崇朝洪流半天下其魚
悲故國匪兇猶曠野搔首望秋雲誰容與言者

金松岑邀遊鄧尉不果往詩以荅之

諸峯環具區高下如點黛青芝接銅井尻雕互鉤帶蒼
鄧尉山幽蒨此其最深藏萬梅花自作衆香界花隨崦深
淺山與花向背僧房綴蜜脾掩映香影外白雲終古蓄清
梵四時會探尋少勝因東望久長喟故人今孝章尺素遙
起廢雲梯期共登嚶谷出真愛便當促遊裝我負子還戴
云何海上烽倏忽照吳會雲中翔怪鳥地底裂鳴旌居人
尚爭藏行子豈容輟吾生命窮薄興到物無礙甯驚破柱
雷甘了作詩債遭迴竟未果心訟口難對遙憐苔壁青缺

我醉書疥不知君兩屐幾度破蒼靄攀條憶吾曹坐惜西
日暖古人陳四美偶值非夙戒他時卯色天輕浪一帆快
終追禽向遊息壤此詩在

園興

夜雨度西園侵晨一遊目境寂覺衣單人閒知樹綠依叢
晚花盡接葉殘鶯續何以悅幽悰題詩半青竹

題洪棣丞詩稿

文事二百年桐城樹之絜正景求地中密不爽毫末劉妣
兩巨公維斗高嶸嶸緒餘入詩篇六義相拊戛鑒和無震
駭磬管有清越不廢王朱流兼繼李何絕觀其用力勤萬
漬恣海納遺蹤漸蕪廢熟辨郵表暇先生起新安遠蹠踵

鄉耆藏能六藝濟囊亦九流括高文振羣賸海內瞻正轍
冥搜五際初力矢一手斡孤吟堅閉戶從壯至白髮冷
朱絲絃皎々澄潭月雷淵窅然深玉尹溫其達甫白樹高
軌魏晉兼采掇調必諧中和體實慎流別居然劉姚後正
始完未闕如射不出正如甜蘊乎蜜聲音通於政喪亂今
甚烈廿年播輶軒其調皆殺伐民生日塗炭人紀寢隳裂
將求性勝情端在冷審律王風出閭巷雅道資英哲如何
繩蠶貧獨挂屋壁舌覆巢鳳不至音待歸昌發神鐘德水
沈逸響風雲揭藏山俟千古閱世吹一呖慨焉同此心高
吟對寒雪

題倪子新先生詩集三首

先生經世大儒不謂其詩復瑰瑋如此昔文恪公
撫皖督浙學先生皆在幕中韓時幼未遑請業然其
狀貌至今記之文恪以光緒戊子監臨江南秋試
故事監臨得薦士一人其法得卷後以朱紙特封致
主司即主司知其必為當代名宿矣文恪將薦先
生卒以例久不行而罷云

黃鵠奮奇翼一舉知園方日月所光被元氣同翱翔民物
入情性山河資慨慷獨抱管葛姿終老木石旁

詩人闕經國雅頌疇所為一歌顏巷中倬此雲漢詞吾及
見其人貌皙碩且頎開卷如夢對赤手捕蛟螭

晚世廢通榜逸才多隱淪焚香欲引薦夜起終逡巡四紀

幾朵海萬途一酸辛與為清廟琴曷若爨下薪
池上作

坐看水文生因知池上雨弱柳未勝風新桃李如女惜
春向暮感：情多阻幽境易傷神相娛賴禽語
東窗直深巷盛暑竟日多涼風欣然作詩

世情憎故物百往輒百窮天公獨哀人贈以六月風闌牖
近深巷老桑在其東涼飈振枝葉竟日相磨舂洞幌清冷
冷映衣碧濛々舒簟卧其下夢落深山空嗟彼當路子觸
熱走蘊隆焉知百齡促擾々同蟻蠛聞昔栗里人自許羲
皇同火雲炳六合獨不及此翁擇術固有殊巧拙或工
吾廬亦吾愛奮跡期相從

題畫芝

追逋急如飛
租庸密如篋
三錢糴斗米
農父身長飢
不有西山薇
尚有高山芝
草木肯我活
苛吏空爾為
勿使苛吏

聞恐復稅山溪勿使芝草聞恐其為我萎

甲戌元日獨遊城北用陶斜川韵

履端久非故賴茲百工休時人別有懷歡然騁孤遊背郭
涉荒翳開顏俯眄流新陽入陂澤潛氣驚鳧鷖
橋五城架崑丘遐哉南巡跡欲問誰我儔提壺就蓁墟獨
酌更自酬蕭蕭兩蓬鬢更有黑日不流坎信所如雙遣樂
與憂加年亦吾幸已矣夫何求

海西庵懷梁文忠公公嘗校書於此莊思緘召余助修通
志兼典書藏余以志中一例有違斷心卒未往也

牆南廬橘陰古色映蒼蘚鬱此貞翠姿伊人若在眼賜珎
歲月深旅食江湖遠投身百城中編繫恣遊行市朝今已

換富貴昔未免淒其負土心赤脚踏雲巘江濤晚猶怒遊
子淚增泣蒼茫鼎湖雲靈瑣如可款名山有前約五載竟
未踐守藏性所耽載筆余懼選升堂仰風義即事得懷卷
緬企魯兩生庶獲公一莞

長春橋東荷塘殘花尚存用簡齋夏日葆真池上韵

中宵鳴屋雨快若蘇宿病殘暑雖未收金神稍司柄荷塘
去不遠適我謀野興周遭千綠圍俯見秋影靜貴遊等雲

夫走馬立不正豈如世外人容與天所贈徐娘今老矣風

韵尚臨鏡酸霜行鼎來花意顧能定林梢何王殿駭此金

碧盛

塘上有崇構報
萬壽宮材為之

興亡已偶然芳臭益其賸西風響槐

陌助我凝碧詠委懷付沙鷗泛泛共煙艇

雨夜感懷

不知江雨來，葉響驚我夢。秋聲滿空城，涼意襲高棟。七旬困炎暑，犯輟今祖送。蕭條滴幽懷，颯灑助清諷。年加如債積，歲去劇矢縱。鴻飛空羨冥，龜六豈藏用。端憂浩無始，孤抱寂若凍。階蟲亦啾啾，良夜分汝共。

對雨偶興

鑪煙引微風，青蛭抽一縷。遲回未肯去，裊々傍梁杙。拋書嬾不讀，挂舌默誰語。移牀面牆坐，鏡裏看飛雨。花枝稍空濛，苔色已淒楚。行官南畝來，紅稻粲登簋。今年劇水旱，幸未空我庾。豺狼塞四裔，捐瘠遍九宇。一飽未易逢，吾生已多取。

小家院落中始見草花名落陽者

斜陽射圭竇鳥下秋風寒青苔數尺地豔影驚嬾姍紫蕤

隨風飄綺瓣若霞攢娟然發幽靚擢秀凌茅管老夫見未

曾杖繞百盤桓芙蓉對金菊粲爛升雕闌無言寵辱際卑

處上聲獨能安采擷欲盈把念汝羅衣單芳歲行晚矣佳人

渺雲端去々兩自愛孤生非所歎

遊商家舊園池時禺筭將遷板浦矣

綠池蘋自合靜繞朱闌梢崩藤卧作橋秋葉風裊々孤花

暖煙榛怪石立荒篠梁回萬牛重樓曳長繩倒鴟鴞毀風

雨燕雀等焚燎銅山有今昔非爾獨不保百年財利區一

旦風電掃敗者不可言葛帔裹黃槁完者復北遷空宮鎖

啼鳥

遊焦山值雨次程善之韵

紫金江中流其半今在陸豈若焦公巖江水長繞足蒙頭
雲濤中與世絕耳目孤定石窠窠坐閱浪漩湫南徐再開
府晨夜劇遊躅尚嫌鐘磬喧膏屑冠蓋簇長流挾飛雨淒
冷稱吾屬簾開萬里天雲物紛起伏西龕怵兵氣東拍盡
夷服坐令太白豪欲學伯輿哭逝者如斯夫千載信一蹴
稽首謝焦公商芝甘局促

懷秦舅青兼簡宣愚公

晴樓吐海蜃燈榭炫天魔鷺聲塞晝夜輪轂一何多誰知
塵榻中有客獨晤歌持籌信煩辱管記赤婆娑牀上連屋

書暫歸臥爬羅縹囊撲陳蠹翠墨走篆蚪題詩遠寄我語
妙追涪皤愚公不移山日與古琢磨袖中秦漢璽玩弄久
向鉞濱海得二士豪街成澗邁何時一尊酒把卷共行窩
次韵包右輔貴池見寄

一書詩十篇一日書數至開緘秀可挹尚帶九華翠掾曹
一囊粟粗了公家事感頽苦折旋挂舌取徑醉驚濤拍我
圩事定夢猶悸豈如世外人醇酒老無忌讀書與博弈等
不救天墜身如膏鼓頽定著幾兩屐君詩鸕鉞砭我則蛙
鼓吹顧使丹黃之欲一殊途致念昔杜陵翁分曹失同異
高吟對嚴武茲事可把臂秋風動鳴蜚涼意初破睡攬詩
如其人字裏見溫晬和歌廣君心亦用快吾意

This image shows a full page of blank graph paper. The grid consists of light gray horizontal and vertical lines forming small squares across the entire surface. There are no margins, text, or other markings on the paper.

含光詩

歌行

望仙吟 以下光宣朝

山之遠白雲銜仙之居翠嶺巖望而不見唯見江上之風
帆帆隱隱風泊不知何處鳴琴瑟桃花流水忽焉沒
時為此詩先文恪公極賞其末四句前半則後所改定也

松林庵古松歌

君不見松林庵白日慘淡無顏色老松盤盤自何代千尺
根無一寸直高松世易見短松難可得壞垣古殿深覆歲
急籟崩濤晝蕭瑟一枝橫舒夜叉臂入骨細筋垂至地一

枝蟠卧如猊龍夭矯掀騰恣快意癭瘤虎魄奇絕倫黛色
蒼皮閱古春布葉盡疑纓絡挂盤根儼有龜鼉蹲人言去
地不盈丈森梢四出平如掌知有雲霄未肯干豈無車蓋
從渠長蒼髯使者松之精遙知五鬣能鍊形我求仙人不
可見但聞松花松子拂：留餘馨昔年太山路嘗拜五松
樹古貌支離各異趣今觀此樹信神物已覺暗與精靈聚
擁腫毋為繩墨牽恒河沙劫全其天

歲暮行四首

今我不樂思悠：歲云暮矣增煩憂更長燭明不能醉夜
起急走仍科頭南鄰悲呼北鄰哭明星漸稀雞喔：朱門
妙舞吹笙竽嗟汝悲歡豈容獨

齒髮日盛智慮微昨日今日知誰非古人往矣不可作來
者未至吾誰歸曜靈西飛不停鞚嗟我何為逐昏旦百年
不肯更百年君不見南山白石爛

堂前何有青松林高枝蘿蔓久見侵霜風捲樹吹蔓去童
車蓋長清陰主人撫松三歎息見爾歲寒真獨立天桃
豔李各有妍咫尺陽春恐相失

繁霜殺草高原空蝨蟲萬族俱潛蹤江湖瀕洞老龍宅神
物亦復蹙其宮雲飛泥蟠有羸縮哲人豈得譏雌伏震雷
急雨春水生佇竢騰風好頭角

閔貞牛

江都閔孝子能圖人物古莫比今觀此畫亦絕工寫牛乃

與圖人同所嗟紙本久剝落姓字漠：埋霜風諦觀始歎
果貞筆慘淡盡出經營中上方半紙黯深黑沙草離：雲
墨色森梢萬柳青拂天想見郊原成一碧一牛掉頭如欲
鳴一牛整角方徐行郭樹丁櫟各殊狀花踈掩映沙水清
牛人蓑笠爾安往洪縻盡脫形神輕我觀此圖意悽惻畫
手知生全盛日憶昔太平日無事貴粟明農有經制牛革
已看韃弓矢鋒鏑仍聞鑄耒耜帝籍年：御紺轅人家往
：豐烏牂夢地魚旗屢入占其牯九十紛來萃此時斗米
直三錢租庸不擾民安然畫工飽食日無事戲寫動物天
機全自從海內困征役稅畝量田使臣出農夫饑婦散如
煙阡陌荒涼長荆棘吁嗟乎爾牛空有力百鈞不能使我

稼穡多如雲上奉官租下足民何為空長好蹏角尋山跨
谷來逡巡古稱工執藝事諫豈無雅之考牧風之豳貞也
昌不圖以娛吾君嗚呼安得貞也圖以娛吾君
少年行

朔風鳴僕鐔鷗落白草枯并州城南擊赤狐左射右射兩
雕弧寒雲漫天飛白雪五花馬蹏碎流血胡兒馬上胡笳
發東城妖姬當酒樓壁閒挂倒千金裘玉盤纖手呼藏鉤
如澠之酒飲不得門前馬嘶天白色去殺君仇報君德
效庾信楊柳歌

子山此歌蓋傷故國而作詞麗旨隱仿佛離騷誦習
感懷輒事比擬至其聲情之美固非後人所能幾也

鳳城楊柳嬌春煙千條萬緒相接連條垂金縷花覆縣東
風一日能三眠美人三五華月圓斂襟端坐調絲絃停箏
罷瑟意怡悵攀條欲語誰為傳公孫昔日樂遊原青驪蹀
躞花連錢垂楊拂馬馬不前軫車飛去聲聞漢道方昌
樂萬年明堂合樂陳宮縣鳳皇十二聲淵玉女一咲黃
金千忽然滄海變桑田霧露霑衣陵谷遷平津夜度逐螢
火于湖馬去留金鞭由來富貴皆可憐結根恨不深九泉
君不見靈和殿前感搖落延秋門上唳烏鳶人世盛衰無
不有金城重到還泫然不如九轉求神仙化作柳星飛上
天東烏西兔任盈昃歲年霄漢邊

追懷譚茶陵兼述舊遊

韓八歲時 先祖中丞公按察甘肅總督茶陵譚文
勤公鍾麟同官相得瀏陽譚公繼洵官布政其子則
戊戌之變所謂譚嗣同者也三家子弟交往来歲時
長者張飲合樂追逐如里閭甘肅有小西湖最擅煙
水殖萑蒲菱芡周遭數里公暇日召韓輩遊集其地
邊省少事又內殿實揔督出笳吹騶騎甚盛既至官
具采舟設水嬉西地苦寒無魚蝦之饌蟹二螯直白
金四兩公宴羹鮮鯖財三寸恒取給小西湖公入舟
則命縱罾網之屬羣兒大樂中筵公以放魚徵對韓
應曰救蟻公大稱獎書元章鴻臚初唱第一聲之句
為賜且引湘人言諺跋其後又別書扇呼小友焉公

明於知人才力威斷足以幹事其燕閒之際雄談引
滿有可念者既中丞公巡撫安徽公目疾賜告自
是不復得見後又出督兩粵兩粵多事公耄老卧治
之而已又賜告不與庚子之亂時嗣同已被禍瀏陽
自鄂撫罷中丞公前以閣學乞歸薨於家矣三公
者既皆去官公幼子延闈竟試禮部第一今年公薨
年蓋八十餘朝廷賜卹予謚下詔稱能持大體於是
上益知臺吏不足杖尤薦念公公最號知人最知韡
而韡最不偶夫愛犧者固不願其衣文繡而入廟中
因為詩道舊時歡宴之情兼及人物眇然之感時去
見公十九年韡生二十七年光緒三十一年乙巳也

憶初見公自隴西我年八歲公六十升堂親蒙辟呀詔倒
屣不俟吐哺畢同窻吾祖若昆季視我猶孫侍公側轅
門春長鼓角稀卧閣香裊花枝裏迎致每嗔車馬遲送歸
反怪更籌急瑤林玉樹公自有顧我豐盈豈竒物小西湖
邊水雲白蒲蒲風絮煙蕭瑟隴人貴魚不貴肉丙尾登筵
一金直公鳴騶騎湖上來翠幕照波天影回畫船命酒載
眾麗簫鼓沿流清且哀嘉魚是日忽躍出顧我屬對公顏
開濃揮醉墨字蟲砢相許誅蕩登瀛臺知公取類有深意
欲遣鱸鮓隨雲雷此湖水小魚亦小豈有跋浪長鯨才廿
年困厄守鄉里七尺骯髒藏蒿萊每思舊事發狂嘯莽々
西極悲風來中丞墓木森已拱公亦湘江尋舊壟拂雲

樓頭賓客稀。皋蘭山下車塵動。黃河天外浪淘涌。萬事東
流不旋踵。豈唯人事有別離。已覺戈甲紛濛濛。西幸天旋
黃屋移。北極笳吹紫煙重。同時高會復何人。東市朝衣可
神悚。嶺南又見持節至。新法尚聽羣言洵。但令鎖鑰資鎮
靜。足為衣冠醫闕茸。韡也黃冠草服人。公今清廟明堂身。
平生甚愧丈人厚。感激難從賤子陳。北風慘淡吹江濤。公
騎箕精朝紫宸。古因云亡歎殍瘁。今況多難方風塵。願為
申甫下九閭。再都將相勤吾民。扶持正直自造化。鎔冶物
象歸陶鈞。郎君行馬雖貴盛。濟美不在要路津。吾方垂竿
釣逸鱗。為公慷慨歌招魂。

雞鳴歌

雞喔：聞我堂夜如何其夜未央雞喔：聞我室夜如何
其夜猶黑天荒地老風雨多誰人唱此雞鳴歌帳中壯士
枕戈寢一聽身欲舞再聽頭為皤我欲涉水川無梁我欲
登陸山嵯峨關河萬事心眼底夜：聞聲呼起：命我盲
酒酌我同袍我有駿馬子有寶刀佩刀跨馬出門去夜如
何其五更度雄雞一聲天下曙

翟莊芍藥歌

城中日：馳青驄金尊到手白日空荼蘼花老桐葉大舉
頭始覺清陰濃坐催春駛不知惜屈指花事行恣：人言
翟莊芍藥好曷往及早欣相從步踏沙郊比雁影路轉村
曲隨牛童看花竟識在何許但見桑麥青濛：綠陰轉盡

平野出照眼十畝騰青紅初疑雲錦曳連地又似襍佩搖
當風凝神始識近花埭千葩競坼言難工就中國色誰比
似九嬪端麗居寶宮羽衣霞飾儼旁御高髻不動雲僮
詩人往昔吟泛洧頗嫌謔浪無雍容天然穠貴賦此物牡
丹能擅花王封憑觀不足反歎息曷不移致來城中豪家
馭金劇春草一朵價直兼金崇美人曉鬢香露壓畫史綺
筆春煙融此鄉爛漫一萬本孰與鄭重唯花傭朝晚東西
過牛跡好事並少蜚與蜂青陽況晚禰英謝婪尾空伴疏
璃鍾遭逢才地古難合人生視此將無同君不見蘭堂深
密貯嬌麗燕趙徧野求昌丰王姬早嫁盛穠李佳人晚鏡
愁秋蓬雲栽露種渠有命欲補造化誰為功願懸此語告

香國恨少筆力如長虹乞靈更借花顏色化作晴霞天半烘

升天行

我欲升天天門一何崔嵬天門亦匪高天路亦可梯玉皇

坐紫庭上隔三重階仰見王母鎮頤指揮一解羣神謁者翩

翻百獸猛虎來往若煙淮王居上頭從以列仙誰何王子

娟然少年二解玉女載著後車朱顏紈質蕙軀並奏象管鸞

竽上排雲閣玉虛觀者目駭意徂三解開豁四闢天門中開

下士魚睨轟騰如雷白玉以飾路黃金以為階手攬玉女

袂颺颺戲九埃玉皇不問王母無嫌猜四解雷車轟電鞭掣

張天弧射天狗執法居前御史在後刊章列淮王淮王不

言王子指其口但見御史蒼黃下殿走

解五

美人篇

滿堂多美人一國爭春風美人色殊異各自顏花紅風從
四方起吹送入雲中香車流蘇憶寶馬浮雲驄漢皇坐待
久大啟甘泉宮詔使美人入美人爭自容不知美者誰但
見高鬟寶髻花璫瓏六宮虛席亦已久待汝雲鬢當祁僮
微聞長門人買賦千金工又聞昭陽后善妬自矜崇子夫
小家女趙后邯鄲中一朝被選擇身似青天騎六龍人生
快意貴旦夕甯論避輦兼當熊漢皇重色今如此美人身
世榮華矣丹鳳朝銜一紙書貫魚已見如雲起坐使南朝
碧玉家鏡中夢咲窗閒喜我聞若耶溪邊春浣紗穿花映

竹美人家依稀綽約真是耶苦辭萬金聘不上七香車美
人之美如朝花美人之遠如高霞可憐塵世金條脫無限
天仙萼綠華

後美人篇

梧桐愛孤生夫渠守紅死天人不言咲十載香閨裏香閨
高絕連雲空俯看人世爭春風馬如星電車如龍年々香
字冷熏籠坐窺寶鏡愁春紅玉顏窈窕矜不嫁臨風愛惜
香羅帕東家老女過三十玫瑰著春春入骨一朝陌上簫
鼓迎狗走雞飛將亦得箱中金縷衣出自鴛鴦機鴛鴦不
獨宿何為戢翼羞雙飛盛年當惜即須惜況是露桃已發
河冰稀苦耽翠袖倚修竹不知漢主離宮三十六珠簾碧

瓦悄無人夜：宮娥守金屋我願美人能自珍不願美人
難可親若教神女都無夢多恐無鹽笑殺人

扇上馬圖歌

丁方伯峻昔於韓扇上寫三馬無鞍轡雁行絕塵而
馳後一人騎追之餘作沙漠莽之勢戲題短古

一十六號飛電動三馬身輕一馬重重者飛追輕者馳勢
若強齊搏桀宋丁侯筆掩曹與韓篋笥廿年今檢看風沙
茫：大戈壁騎汝往問燕然山

動重二字東坡已押去聲

望西山歌

西山吐虹蜺飛雨灑天半蒼然帝城西列此青玉案西山
多白雲長安多貴人西山多水石長安多熱塵西山雲氣

長不改朝出山中暮歸海長安塵起何茫：上公貝子諸
侯王下者十部尚書郎驛驢蹴踏車生光暮朝長樂朝未
央不見西山雲但見肘後之印金煌：不見西山水與石
但見九衢汗雨流成掾鐘鳴漏盡喧聲接後者疾驅前者
跲已看荒冢卧麒麟復見花團圞胡蝶回首西山長不磨
山乎汝竟如情何不憂人世移陵谷空向雲天掃黛螺
檻鶴行

翬然獨立者為誰蘇耽之孫令威兒長軀七尺局短籬上
為霜雪之所偏下為回飈之所吹不飲不食復不飛飛時
須上九千仞十弓之地安足容汝為慎勿閣：鳴聲悲主
人憎汝聒衆鳥怒汝癡不知主人拳汝將何施令我對此

心然疑繫驥四足使疾馳立馬於仗怒彼嘶百金求士傭
置之世閒萬事共如此鶴子何不歸飛深巖之幽碧山裏
鳳為友鸞為儔一鳴一和三千秋歲不我與時既失安能
扶開青雲見白日下呼主人報盛德

平陵東

以下壬子後

平陵東雲雷風雨何人劫義公鴻卻陂反乎覆豆羹芋魁
炊不熟走馬交錢安可贖義公可得死劉氏不可止義公
死平陵聖公起南陽

張引之聚端州石硯十餘為賦長歌

張君行身何跌宕巨頤廣頰千夫上前身疑是陽武侯柱
下主書稱計相官曹文牘亂如絲削札風飛空所向休日

還家洗袍袴，蕭衣高坐延。石丈方圭圓，壁十七八各出異。
態窮殊狀此，是端州溪上雲。怪君何自窮，尋訪故家法物。
遭喪亂，或掘科臼，搗礬盎蒼黃，求賣抵一餐。邂逅得逢供
巧匠，鸚鵡斑斑，青眼明黛螺冉，修眉漲滿堂。古色森天
球坐對，自可揮諸妄。往時琵琶醉花月，燕脂走馬相譁浪。
豔歌聒座燭通宵，筆硯塵封堪覆牆。漢皋珠佩今何在，石
友相看幸無恙。有情孰能無一寄，金簾或者慙屐納。自從
汗馬收揚州，才俊紛々角飛颺。羊頭已博關內侯，狗尾更
續金貂行車馬。如龍散廣筵，美人列黛充。帷帳范睢不復
憶，拉脅蔡澤但聞工。扼吭夢回蟻穴門，牛聲一覺槐安幾。
興喪硯田雖薄終無稅，富貴縱逼須嫌儻。因君起矢墨池

君共秘此言無速謗

即目

黑雲奔日奪日光返照忽射墻端黃樹陰深明樹表暗雲
過日逝俱蒼々瞬間變幻有如此心似蛇驚電滅飛鳥翔
邯鄲大啖千百場喚起盧生炊黃粱

自題戴笠讀書圖三首

幽篁冥々余所處頭戴笠子不知午旁有九州上千古我
持問書書寂然木末四山風且雨

黃農逝矣吾安逃蜺龍梟鳳同一曹我笠幸與秋天高俯
頭啖問謝安石往為蒼生母乃勞

四十未有三十餘中無一有如豬奴心可草食隨耕漁野

塘減沒歸牛鼻挂角時、誦漢書

在都題賈劒青為余畫貫柳鰕

桃花滿江春鰕肥橫鱗一躍飛千機嗟君胡乃不貌此反

寫周宣鼓中柳貫之寄書魴鯉慎出入侯鯖空貴安足希

日暮蛟龍窟穴改滿眼江湖應可歸

傳心殿觀香妃戎服像

黃金鏤甲珠盤纓寶刀玉手光相明回身想見天一咲側

上繡鞍如燕輕兒家部落陰山下人似桃花花似馬上

聲婆曲未終一旦飛來入漢宮金屋綺鸚愁不語夢回種

帳烏呼風故寫戎裝寄愁臆燕支奪後心蕭瑟今日圖中

百媚情當年箭底雙飛翼秘殿春禽變柳絲荒臺遊鹿踏

芳菲興亡轉眼皆陳跡閒倚東風嘆息嬌

槐堂為陳師曾賦

君不見殷仲文誤附桓溫兒晚對庭樹悲時移又不見王
晉公以德封植世愛之人間一種閒草木苦借旁人作榮
辱眼前突兀此草堂陳侯客居張子築陳侯畫妙世莫比
一日須盡一百紙陳侯詩更比畫工蟬吟西風雁叫水長
安熱客車塞途侯也高吟呼不起南柯戰蟻方紛然綠陰
下覆深如山車聲繞鼎棟芽熟起來摩眼看青天湘江中
丞有風烈散原老子身玉潔陳侯鄉長兩不慙槐亦與君
共根節後五百年看積鐵

燕歌行齊梁體

二月江南楊柳絲三春塞北望鴻歸試將懷中一書札持
寄燕城輕薄兒燕城游俠本成羣結交角勢何紛紛始見
田竇傾移數復道張陳刎頸新昨者南山親射虎甯知今
日李將軍翻手為雲覆手雨黃金解言白刃語勢回日月
使東行力倒江河更西注舞陽座上請橫行馬武腰閒雄
劍鳴鐵騎蕭々度遼水畫角悠々向薊城肘後金章大如
斗馬首桃花紅似鞵詎畏春江惡風浪且矜易水有歌聲
歌聲易水人離別舞袖倡樓愁不絕回雁峯高隔陣雲盤
龍鏡掩傷明月南中羣鶯飛已亂北地征衣久應脫安得
聊城一箭書使我征人罷飢渴杞婦城崩豈足言蘇蘭錦
字幾時還方見大風思猛士徒勞零雨詠東山

古鏡引

何人掘土得此二圓鏡一完一缺光相映完者三五二八
皎月光缺者上弦下弦天末遙相望瓜皮削來瑩寒碧土
花斷處飛秋霜蛟龍九子相縈結良工鑄就無年月不知
當年持此果阿誰想見蛾眉初盛時正著額黃增巧笑背
窺雲髻轉腰支粧樓舊蜨飛寒菜獨有黃泉雙鏡在鏡雖
在人已非絳脣朱袖兩寐金鳧銀雁徒飛々世閒萬事
共如此君不見主父五鼎食蘇秦六印歸一朝失勢辱螻
蟻樵夫拾得珠襦衣名亦竟已滅淚亦無人揮豈如此鏡
人歎息萬古菱花想芳澤丈夫甯對玉臺一咲雙頰紅誰
能刻鼎與銘鐘

戰城南

戰城南城南塵起黃如雲雷火烈缺衝車奔朝戰江水汜
暮戰湘水濱南風蕭瑟鼓聲死朔馬飲軋洞庭水軍中日
費萬黃金露布宵馳三百里春風二月桃始花飛燕歸來
不見家居人半作溝中血戰骨多於龍畔麻城中何所有
但見銜腸上樹爭烏鴉中國匪異族兄弟猶一人豈如草
木殊臭味生死不得同陽春將軍金印已如斗曷不少息
休吾民願把騶虞幡指揮六合消煙塵不願生存作豺虎
身沒圖麒麟

雉子斑

雉子斑采繡文袞為背罽為身飲啄原澤遊芳春與人無

患心安馬馴誰令東家之媒來見之隱籠伏翳潛相窺鳴
長雌清且悲一雉起百雉飛飛飛不息一發中黃墮綺
翼平生與爾族類同臨難相傾更相賊酈況賣呂祿往者
如一身張耳共陳餘本為刎頸親人間禍敗有如此何況
禽鳥元非人請君勿奏雉子曲聞者鼻酸辛

吉祥庵看牡丹花高及屋余八九歲侍

先祖中丞公在

甘肅時茶陵瀏陽兩譚公為揔督布政布政署牡丹百

本花三丈餘三家子弟遊戲花下瀏陽子嗣同長余殆

十歲茶陵子延闈年相若耳今三十載事變如煙俯仰

悲懷成長歌四百二十字

天將姚魏鍾京洛只許揚州詩芍藥揔言兩美不容雙誰

信春風未寥落小寺城西錦繡堆一株深紫百紅衣二百
年前舊根在昔時壓砌今緣扉簾深幕掩圍霞氣露葉吹
香使人醉玉女春粧欲罷時星娥五色來分隊絕豔方知
欲畫難香嚴全不畏人看憶從何處見傾國茗甌坐對心
茫然皋蘭山頭天接雪四月無鶯喚春節根徒三危玉露
寒花開十丈冰天熱布政園中花最繁繞樓穿屋壓闌干
香中酒氣蒸成霧枝上星光拂似丸二譚岳牧聲名久子
弟三家呼小友余幼蓀襦二尺強花間竹馬工騎走闔也
搖毫解綴文阿同跳踉最殊羣尊前蠟鳳成何事物外聽
鷗自有人三十年間互災變繁華過眼如流電東市晁公
泣智囊湘西關羽愁酣戰豈但窮邊鼓角悲中原荆棘亂

如絲名家花葉隨薪賣勝處樓臺有夢歸余卧鄉園成孤
落同亡閨貴空相索却憶金城醉舞時茵飄溷墮終誰覺
快犢由來解破車貪狼近日更磨牙不知富貴幾時極爭
使神州分似瓜江北淮南此都會翛然偶脫風塵外遊女
仍歌玉樹春商人尚飾承平態巢燕紛々啖鼎魚道人
不復為嗟吁逢花且作千場醉覆鹿真知一夢餘白石巖扉
藏聖女夜闌索共朝雲語預綴珠燈一萬枝來朝未必無
風雨

朱菊坪自哈爾濱還作歌贈之

朱生長不滿六尺跌宕自云江海客胸中兵法五十家腕
底春陵二三策傳食諸侯晚未遇持籌泉府貧反急結髮

相知二十年脫巾嘆視俱頽白沈默近知酒德深艱危苦
歎風塵逼丈夫伸屈自有時雖處囊中璧藏石北遊落魄
今幾年向人白眼初無言前年我亦向京國相歡相泣銅
駝前我似浮雲偶辭岫君亦拂袖愁無田醉歌燕市覓屠
狗卧夢江南聞刺船素翁老作自娛計八方競賀新皇帝
雙闕雷聲車馬多九衢白日風花麗說符崔發始論賞沈
醉阮公仍奏記金馬遙鳴鼓角風彤庭未輟魚龍戲故人
此際多厚祿肯使長裾向門吏高蹈雖期東海行支頤且
看西山氣余去還山尋故巢君留危國嘆懸匏鎬池遺壁
祖龍死中原從此驅驚濤去歲聞君向東去摩天嶺上看
雲樹今歲聞君復北征松花江畔少人行畫角三邊愁匹

馬壯心五夜擘長纓湘西嶺北空酣戰只使秦人增伺便
騂馬虛甘荀息詞韋牛不用弦高先廟算徒言衝可折孤
客終令淚成霰即今魯柝滿邾城豈有幽都歸禹甸脫身
暫逐南飛鴻解橐猶餘舊時硯與君沽酒但飲之萬事孰
如今會面驂騑少時矜歷塊老睨敔隘色先變還家宵占
烏鵲喜甯親日潔魴鯉膳故里秋風早閉門長安回首休
登岸

短歌贈王子衡

三年白下酣高樓神仙髣髴歸居瀛洲

君在金陵為迎將家
主人名其館曰瀛洲

一年共醉宣南路霜月盈街不忍去喜君五十頭未皤問
君酒態今如何風塵龍戰苦未已誰騎天駟超天河兒事

袁絲弟籍福豪傑而今髀生肉金尊且罄三百杯
笑看桑海茫々綠

敬次家君消寒九首韻

九々梅花數高會詩情已落風雲外人間一夢墮槐安戰
蟻醒時百無賴南服軍聲消鸛鷺北方使節馳明駝眼前
點綴有春意不醉金尊將奈何

逸少去時真大醉題尾能矜有奇氣家風王霸說蓬頭幸
勝陳咸觸屏睡十年大澤俱羊裘上堂願得陳觥籌吾家
阿公壽千萬醉鄉世々皆公侯

人民城郭俱渺然纍々高冢將連天徘徊華表此何客今

咸似是當時仙

丁鑑堂

浮玉山顛望滄海瑤草金光期可采

白鬚紅頰似商山駟馬高車定多悔

仙人玉斧居丹陽至今舊館高良常竹林作達咸與籍許南

友丈及兄子蓉妹豈復貴仕論山王浙江潮勢誰能料黃山絕頂

天雞叫當時五馬朱兩轡把臂山林可同調

步公達者真吾徒印善和尚過門有酒能相呼平生愛佛不斷

肉洗臟未須煩佛圖壞色之衣髮頽白曾與將軍分坐席

叅寥一去百步洪自有山川無此客

有酒且酌金屈卮文身章甫非相宜趙劉醫術古無有趙松

軒劉采臣兩君采藥名山當幾時左手如今假生柳試說君還能

治否莫從祖父賦朝三且問靈均辟折九

羊何座上皆人豪豈若謝公逢法曹祖庚虞文兩林父官齋舊聞

餐首藉涼州不肯博蒲萄叩門日：詩成債短紙弱毫森
百怪似聞鐵石到梅花咲指江西異詩派

往者文襄大張楚阿饗徒步趨官鼓

中表卞孟弢
自稱老饗

十年江

海復歸來紅袖剪燈聽夜雨西子鷓夷對咲言滿牀書畫
不聞喧試問君家松隱閣何似當時水繪園

冰條宿鳥愁孤哢土牛逐後寒應送臘去春還自一時青
松桃李原相共四十頭顱七尺身試拈詩筆不無神獻之
未就蘭亭白願伴淳于鞠瞪人

歌贈劉采臣

韓兒時從松江劉讓木先生受業先生貞夷粹溫表
裏如玉真盛德君子也終甘肅財政監理官子采臣

有父風客揚州以醫自食

溫如廟瑟朱絲瑟絀清如九夏壺中冰松江夫子有淳德使

我至今能服膺我生八歲應關隴先生趨府偕劉應百函
十部豈足道太丘有道真其朋愛我誦書若翻水謂我下
筆如秋鷹慕君尚未識君面預想眉骨高騫騰皋蘭山顛
千尺雪黃河橋下三月凌曹家園子展圖畫小西湖水揩
繒綾舞雩童子或六七每有勝地窮攀登講今說古指其
地書窗到曉留青燈爾來三十有三載夢或暫到醒無憑
龍蛇久應鄭玄讖斲斲豈為羊公興我今自恨百無賴君
尚幸解三折肱與君雖苦相見遲邀君且作百歲期當時
相望兩童冠今亦未有蒼浪鬚喜君毛羽自丹穴愛君風

格如吾師平生萬事同閱水豈但十全成國醫人生何處
游不好有鶴乃向揚州騎揚州貴耳不貴目誰識驛驢空
舉肥丹砂玉札無用處不及馬勃敗鼓皮居停幸賴主人
好甘眠飽食教吟詩語君安坐勿惆悵梅花如雪今其時
雪霜昨者復安在千樹萬樹光風吹人生通塞亦如此有
酒且盡琉璃卮不然三泖最深處手製漁具從天隨鱸魚
四顧儻可得我亦持竿欲釣之

畫魚行為衡陽劉生作

長風掀空波突兀海黑天陰萬魚出丹青貌此誰得之衡
陽劉生筆力奇霜縑一掃丈二尺麤毫巨硯何淋漓劉生
工大復工小亦作纖鱗閒縹緲桃花漲暖春茫々穿蘋泳

藻如鍼芒筆端忽轉風雨急赤鯉涌出如人長鬚張鬚奮
不可當掉尾勢欲凌扶桑盤渦仰視雙眼赤琴高欲控不
得將為我謂此魚爾身本為龍胡為倔强洪濤中泥沙瑣
屑不足繪神物何日還其宮江城一夜雷雨黑懸出滿堂
皆動色漁子逃藏不敢窺饕人納刃愁相泣劉生好畫兼
好仁放生不復論家貧萬錢贖魚罟師手橫江一縱數百
鱗羣魚得水如有神橫跳倒擲波生輪往々欲去不肯去
回首似謝劉生恩生也於魚豈求報只取天機供墨妙圍
圍洋々各有情他人下筆安能到劉生劉生我聞洞庭之
側瀟湘阿十年苦戰戈相磨飢蛟荐食鱷鱷鬥衆為魚矣
嬰禍羅劉生我起為汝歌民勞尾赤古有訓臧僖里革今

則邇君其為我布此好生意盡令九州四海無干戈
安得盡令九州四海無干戈

壺園歌為何駢喜作

停君金叵羅聽我試作壺園歌君家先祖未營此其時天
下方干戈曾侯矯々人中龍一見君祖驚文雄啖談幕府
膠在漆飛書盾鼻天生風同治之元罷兵革男復耕農女
還織淮鹽新票滿人間財力崩騰出禹筭僑者歡娛居者
悅往々傾家買花石當時誰作名園記君家池館最第一
到今事往六十年綺閣珠樓尚崑崙君家家世不可當中
丞郡守來相望海天照耀龍虎節閭里一日生輝光阿兄
踐齒能文章二十已望尚書郎愛君為人與君好看君已

復如兄長君今坐我園中堂回首忽復神慘傷君不見玉
門關外沙茫々中丞擁傳昔西發旌旄東飛忽如雪豈唯
旌旄飛如雪九服塵昏旋崩裂阿兄此際居京闕痛哭麻
衣眼流血揚州明月非昔時十家殘破九家滅烏衣子弟
百不如頗復困苦求為奴君時奉母居海隅年少獨嗜親
文書園林花木亦未毀歸來色養還安居喜君色養能安
居獨惜阿兄今則無人生哀樂豈有極且復置此陳尊壺
巢鶯接葉鳴相呼枝頭蹴落紅珊瑚洞天一品立怪石傳
是軋嘉之所餘令我對此車踟躕何況古藤陰下數閒屋
曾侯昔者嘗來居即今蝸篆黏模糊世間萬事若流水壺
園之歌請止此君父君兄趾祖美公侯子孫必復始堂構

歸然視吾子

个園行為同年李允卿作

个園者黃氏故園揚州八摠商黃至筠次居第七嘉
道閒每鹽務奏銷常倚黃而辦其園在東關街度地
十餘畝他宅屋稱是黃敗丹徒李氏得園之一角仍
其故名巨麗已為揚州之冠清末李以商業折閱負
官債鼎革後園屬徐故上將寶山家轉移之跡世莫
能明也允卿為園主人之孫與僕交厚故有此作
个園城中央開戶臨通衢繚垣列雲漢密石磨階除借問
園主誰昔時姓李今姓徐百年時事三反手令我回首增
嗟吁君不見此園未屬李氏時黃翁考室先來居黃翁才

智雄萬夫千金三致同陶朱嘉道之間財力盛揔商八姓
爭豪橫桑孔秋毫析奏銷黃翁隻手持魁柄堂上俳優日
夜陳門前車馬如雲屯移山轉海在一顧炙手炎々欺要
津不辭布地金與銀買占直至東城闥洞房連闥極窈窕
至今談者神猶振李君年少吾故人買宅者祖君其孫君
家尊人昔愛我招我日賞園中春園前何所有華堂朱檻
波瀚淪園後何所見高樓四合干星辰園中景物難具論
紅蕖蒼檜間碧筠天然洞壑在庭戶坐來咫尺生煙雲黃
園李占纔一角勝絕已復難為鄰何況黃翁昔日全盛當
其身盛衰成毀皆陳跡李園俄作官家宅事秘當時幾輩
知嗚呼欲語難重述君不見辛亥而還市朝變富者為貧

貴者賤巧偷豪奪知幾人大宅高門損輪奐故家亭館十
八九喬木雖存主人換李君李君君勿嗟爽鳩之樂何須
戀況君早讀釋氏書萬事應知如露電君不見乾清宮太
和殿

戲題酒人冷君道服寫真

桂林將軍昔開府草檄飛書君所主書生年少誰敢侮左
挈琴囊右雕弩醉倚伏波古銅柱落筆千言走風雨中軍
燒燭椎大鼓蠻女嬌歌馬人舞羊肉千斤酒潑乳天下男
子張定武甫與牀頭捉刀伍餘子錄：安足數老閒閒閒
丈二組還復歸家守環堵簞瓢一食衣不補夢向南山搏
雕虎醒來白髮生縷：沈吟此事三十年信知由命非由

天高山為谷滄海田我時始與君周旋共謁定武彭城邊
四山寒雪車蛩蛩歸來縱酒踏綺筵謔浪震瓦波濤掀醉
即走向壘畔眠人生行樂真可憐看君此圖貌蒼然無復
磨盾驅蠻犴手中但有黃庭篇君方願侶松與仝我亦夢
寐蓬壺顛他年相與俱得仙仙家不復憂無錢但憂無酒
如流泉下看塵世翻流涎詩成擲地聲淵：為我且買斗
十千

椰子酒杯歌

昔年從史中丞飲張太守玉甫家出椰子酒杯觴客
其柄鑄銀為人可二寸勾銘七字曰家在緬甸酒樹
下是日大雪酣飲極歡今二十年余復買得椰子杯

二因感往事歌以紀之

楮枿之木生蠻溪上枝千尺干雲霓無陰舊說左思賦結
實纍々不知數剖來應似楚江萍剗出還如魏王瓠良工
鏤刻龍與鸞遠儕玉斚登金盤我初見此張侯席張侯為
主史公客是日嚴冬飛六花貂裘促坐喧箏琶百觚鯨吸
興未盡座中酒氣蒸成霞柳杯後出人爭看粲爛銀人立
杯畔自說家居酒樹旁故都喬木留長歎象郡於今不屬
秦銅仙自古愁辭漢史公對此心慨慷妙年擁節清南荒
珠厓棄後銅柱在歸來綠鬢新生霜黃梁富貴真如夢何
況興亡迭賓送請君罷酒勿復斟雪甚風嚴夜將凍此事
經今二十年雙杯買得心悽然二豪木拱風流盡回首黃

壚何處邊

蓮鐙曲

中元露下秋波澄大隄水上多蓮燈越巖楚鬼事茫昧桂
楫蘭橈恣遊戲蟬穀輕黏頃刻花蛺膏倒蘸芙蓉蒂柳外
斜陽金碧明中流一道梵歌聲散處如從天女手流時真
比羽觴輕一更野靜陰霞彈數點緣流襍漁火二更月上
水煙輕萬燄熒煌如亂星波底飄翩渾不定葦閒颭閃或
孤停三更以後風聲急冥籟幽光滿船入水府然犀怪恠
來河宗獻寶驪珠溼紅袖青蛾驚露多水深月落將如何
青燐恍忽四邊起戰哭頻年足新鬼試作傳芭楚些歌歌
聲怨咽燈光死君不見桑乾水北大同西十萬頭顱踏作

泥江南兒女無愁甚猶自燒燈作水嬉

陳炤畫歌

明清以來數畫手老蓮青蚓皆絕倫自從二子沒繪苑索
莫無精神陳炤晚出江之濱筆力奄與崔陳親掉頭宇內
孰能敵不獨維揚一俊人揚州人物當世奇容甫文章春
谷詩後來炤畫復挺出如鼎三足光陸離炤也少賤貧弄
筆聊兒嬉一紙初出驚其師丹青忽若天付之爾時畫史
著者誰王素八十聲早馳素唯師俗不師古屢以纖媚矜
風姿炤旁竊睨心然疑歸來盤礴坐一室奮腕蒼茫鬼神
入畫人直到武梁祠寫馬如看伏波式金碧山川益輝赫
巨壑長林元氣溼貌蟲欲躍鳥欲飛纖草穠花徧春色圖

成往：綴小詩清妙已入唐人律天生逸才無不可萬象
豈足當揮斥時人不識駭且謗共嗔炤畫多濃殷扇頭只
玩蓮溪竹屏上空張鄭燮蘭馬知炤死四十載一幅百金
人競買燕昭駿骨本未殊今忽驂騑昔駕駘吾聞炤晚苦
病狂科頭不韞蝨滿裳朝：但睡酒鑪旁酒家促迫取償
債潦倒不復堪縑紉生時妙跡人不藏死雖惡札登華堂
九原有識應歎息鼠璞驪珠誰短長嗟今藝事方殫唐畫
摹王素已擅場詩文沉論汪與黃炤乎爾勿為畫重嗚咽
伯牙之絃可以絕

秋風歌

昔我當少年每聽秋風聲中心慷慨思飛鳴即今袖手無

所營坐聽白髮盈頭生既無兩行嗟卑歎老窮士淚亦無
萬里食肉高飛壯夫志金鼎神丹嬾不求虛舟人世心無
繫西風昨夜從天來輜：萬騎如奔雷山搖木拔海潮涌
擁衾起坐心悲哀問君何乃爾淚落忽如水請為客言愁
所起自我聞秋風肝肺槎枒不能已一憂流民滿地寒無
衣嚴霜砭骨風割肌室家蕩盡將安歸二憂沙場殘軀久
欲裂獰飈吹之化為屑家人何處收汝骨三憂膠堅籛緊
弓力輕草肥馬健堪長征宇中何日能休兵兵不息人哀
鳴為我呼秋風何勿變化為春聲使我眼前萬物皆欣榮
鳥為吟其歌花亦發其英胡為慚悽慘慄傷人情天機不
得運人事不可平老夫雖有陽春之曲何由成

追題何鐵生先生雪竹畫兼懷梁公節庵

蕭郎畫竹稱最精所恨但以藝事名豈如蘇翁筆挾忠義
氣洋州一派傳彭城但令畫竹已高潔何況畫竹更畫雪
竹竿稜々立如鐵雪欲壓竹竹不折旁有怪石亦孤潔石
面不染復不皴正如坦夷磊落之高入同光以來數諫者
何公聲名動天下朝日卷阿響鳳皇行人避路愁驄馬
時白簡三四上抨擊豪強和者寡月受諫紙二百番用餘
即掃簷簷根批鱗生氣往々見葉若飛鳴節可捫公書宛
與蘇等倫竹法亦是蘇兒孫平生自賞茲其最持贈
君致心愛六月懸時灑霜雪虛堂却走驚禽魑後來吾
父鄂渚遊一麾公早終揚州梁驄見畫雙淚流梁驄梁驄

江海客二十詞林聲籍、飛章請斷合肥頭一日狂名滿
京國流放猶懸魏闕心尚友未覺金蘭隔袖歸此畫不復
還三十年来苦懸憶我思何公畫此當何時中興廊廟多
皋夔又思梁髯携去復何日上游江漢無傾敔豈知阮隃
翻倒嶰谷危葉垂枝折根株披雪花如席鷓鴣飢何公好
直不好貨至今孫子悲流離梁髯赤脚種松樹手抱龍胡
天上飛不知此圖今日將安歸請從有斐歌君子更把清
風頌伯夷

大雪中觀吳翁觀岱畫冊乘興走筆奉懷

朔風凜冽飛六花掩關寒卧空咨嗟誰與寶繪忽當眼暖
灰快若浮春葭吳翁高隱錫山麓畫品第一非浮李茲邦

文物天所啓倪迂王紱尤滂葩先生晚出掩衆有百氏欲
以一手遮濃皴細染各精妙盡化楮墨為煙霞南湖插架
三萬軸光射牛斗凌嵩華荆關董巨供仿擬集狐千腋無
疵瑕超然藝進道亦進吳船一櫂歸浮家清臚白髮照秋
水身如野鶴誰能笈我興南望想風采隔江但見山嵯岬
西神九隴最深處凍崖荒棧如裊斜澗泉凝盟夏琴筑壁
藤瘦掣僵龍蛇巖封徑塞樵唱斷時有行跡留廬廢龜頭
渚外益沆漭琉璃四合天無涯漁莊蟹舍落何處兩三墨
點投昏鴉山川有意出粉本對此技癢煩搔爬濡毫炙硯
儻追寫輞川摩詰甯爭差愛翁丞欲就翁語梁溪寒涸不
可槎撫琴已令衆山響訪戴何必扁舟拏翁方老愛居士

服我亦靜種東門瓜二泉他日許同隱竹鑪班草煎春茶
詩成郵致作息壤開門急雪翻銀車

陳席帆寫鮪魚櫻筍圖時南北軍方夾江而陣

以下丁卯後

芍藥初穠桑葉入江上浪花風捲破鮪魚潑：尺半長雪
白鮮鱗那容浣江南風物此稱最玉鮪侯鮐詎堪佐北固
山前春漲深出水絲：如落甃我昔載酒浮玉遊十幅帆
輕掠山過漁家舉網得當鮪買取旋呼開白墮松寥閣上
望江海萬里青天歸坐卧淋漓放箸金盤空賸馥殘膏尚
露座歸舟更載三四尾水驛無煩走鈴馱舊遊如夢蕉覆
鹿歲月何心蟻緣磨陳君畫手今第一貌出霜鱗絕塵塵
垂腴最識江水肥貫柳不待芑苴裏禪從玉版叅一味烏

啄朱櫻繞幾個松寥舊事宛在眼不獨老饕餮咽唾今來
又近鮒魚節斗不挹掬箕罷簸危城噤息似寒蟬縱有清
風那能蛻蛻字廣韻二眼前一水限天塹刁斗旌旗互遮
邏北固山前人跡稀罟師相泣魚相賀豈唯口腹阻微物
漸恐關梁停百貨新洲蘆荻不復來吳下蠶絲孰能課錢
荒米貴值今日地棘天荆安可奈憐君高興尚丹青何益
危時守窮餓東南兵氣終須盡春水畫船行可坐浩歌携
爾向松寥釀酒陳魚相倡和

赤藤杖歌

韓五十生日 家君以此杖為賜敬賦一篇

上堂拜獻一尊酒八尺赤藤光照牖兒年五十 親八三

此事人間定希有老藤當日植者誰應在閬風絕頂方壺
涯王喬松子親采得膚滑筋堅曲復直磊砢全資造化工
扶持宛得神明力吾親往昔躋脚輕蛟龍倚壁觀者驚
榮來暫用供流憇捧處頻隨聚德星賜兒願兒長壽考兒
喜親年比藤老但使兒年更似親此君世々真家寶
舒道士魏法師霞城雲海曾相期待兒七十親期願朱
顏飛舉白髮隨飄然直上殊庭去銅鼓彭觥一叩之舒道人元
昇魏法師敬齋與家君俱有夙契頗疑其人皆地仙也
飛蝗歎

五月飛蝗連八月聲如秋風陣如雪纔過北陌又東阡一
刻已盡千畝田田間蝻子尚可瘞但懼飛蝗生兩翅老農

拱手避蝗神共說頭間有王字賽蝗簫鼓村々同秋成眼
看今年空謝蝗不敢怨蝗酷縱使無蝗家亦覆君不見方
田手實法如絲括盡民財官未足官人富樂爭宣驕武人
肩上森槍刀工人廢業嬉市井士人巧說喧簧飽農人農
人獨無力種得薄田蝗更食不辭年々歲々逢旱蝗但恨
太平不見順與康

包蒙谷致涇縣野茶索余書作此為荅包亦能篆

唐人尊紫筍獨貢吳興茶壑源與雙井後來迭出相矜誇
豈知安吳山古人徑絕朝貯風雲暮煙月琴高溪水貫其
中綠茗連峯花散雪采山打鼓驚春雷露芽一々青旗開
囊盛茗裹遠將致盈兩已敵雙瓊瑰我生雅似玉川癖分

惠慙君肯相及風鑪活火手自煎未暇先教三歎息我聞
包倦翁白所居亦在茲邑深山中生平才絕學亦絕至今
人物欽英風偶然餘事親雕蟲下筆已躍天門龍山川靈
秀鍾此老豈但草木滋芳苒君非苗裔宗則同篆勢妙欲
追遺蹤轅駒顧我徒忝々既不能萬言翻水出脣吻又不
能三篋亡書誦盈卷空持鈍筆學塗鴉何用芳甘澆舌本
感君意為君歌人間至理唯茗柯我書不足換白鷺鴻都
況望肩相磨但應長鯨一飲七盃畢為子長歌消水厄
米元章墓

鶴林走問殷七：不見杜鵑花照日眼前突兀三尺墳寺
冷山荒太愁寂文章元祐何堂：蘇黃氣類是秦張高詞

連蹀到秦漢只有墨妙輸三唐風流晚出吾元章筆力突
挽千鈞強河南北海紛腕底妙處往々窺鍾王吳琚詎可
貌優孟紹彭未敢當顏行卜居晚愛北固好畫圖自寫山
蒼茫到今峯巒煙雨出沒處想見潑墨神飛揚英光寶晉
千秋在況我耽書復耽畫故里東園好共遊高齋石丈須
同拜三拍松根呼阿顛暮鐘出樹山沈煙荒藤滿地龍蛇
走猶似先生下筆年

東坡晚會元章於東園
在儀真故有故里之句

對雪放歌

朔風夜捲屋瓦翻曉看飛雪迷乾坤江南冬半未黃落正
似鎔銀下罩翡翠盆荒園老木氣象古壓枝堆葉皆瑤琨
伶俜黃梅花吹香默無言摧積青竹林頭雖搶地心騰騫

跼枝飢雀凍不喧
瑟縮似抱衾寒怨
今年夏旱冬少雨
一雪稍慰三農魂
人情物態兩難說
旋炙獸炭開金尊
一杯膚粟生微溫
兩杯銀海回朝暎
三杯以往視八極
皎色無纖塵
洛陽紅旗新策勲
遼東萬里愁鯨吞
時與俄國有疆場之事
鬥蛇內外蝸兩角
何與藐姑山上冰
雪肌膚人吾言狂
矣君毋嗔

送春

杜鵑昨夜鳴窗紗
打窗紅雨飛交加
石城楊柳幾千樹
曉看半逐西風斜
美酒白玉壺登高
且餞東皇車韶光
歲有今日正似急
流赴壑風揚沙
舊年春去天之涯
今年春去應無家
且飲盡醉無長嗟
金作粟棗如瓜
人間樂事從

汝誇未若江南逢落花

雁來行

春風綠草如絲長故人隨雁歸遼陽秋風吹草黃更碧雁
帶金聲下江北雁中附得故人書字雖少情有餘愛而不
見心踟躕杜蘭香衰白蘋晚故人故人可以返

贈周惺庵

夔昔搏拊鏗鳴球聲詩既作神鳳遊引商刻羽三千秋神
樞鬼藏泄不留混沌鑿死乾坤愁帝嗾羣慝出大幽從以
烈火資膏油燼炳韶夏升鞬韉萬姓不敢私吟謳鵠舌孰
獨排楚咻李公卓犖今無儔涵濡孔逮羸劉躋古不懈
老益道手鍊媧石補不周我欲往見無輕舟賴子惠肯作

蹇脩使駕十駕追驂騮然若渥赭中慙羞念子年少美且
優攀挈籍湜蹤劉侯采珠入海飫所求辟行道已臻九槲
但勿反顧回其輶獄有神劒光射牛千狐之腋成大裘雲
鵬風積乃上浮子行矣勉資糧餽何取來問東家丘

題秦人李月溪摹昭陵六駿圖刻本

昭陵石圖有六馬剝蝕以來誰見者李生妙手摹得之裁
為盈尺勢益奇權奇磊落態非一飛出天閑追白日風沙
或著箭滿身踉蹌懸知世無敵太原公子神所歆南征北
伐俱梟擒豈唯猛士翊天策馬亦與人同一心功成惠養
留圖畫

此韻依宋
人借押

褒鄂英姿此其亞從來天骨不易摹良

工壓倒將軍霸自從海內多焦煙三秦戰血流成川鑿跡

高馬滿山谷苦為羣盜供笞鞭九峻山下昭陵邊蒙龍荆
棘高侵天白頭父老眼垂血汗流石馬知何年李生圖此
不無意天驥呈材古為瑞要使飛黃服帝輿如從戶牖驚
真氣即今豈但無真龍並無武周黑闥李邢公草間房杜
飢應死側眼駑駘背錦幪

楊生馬尾筆

王良挾策當天庭天駟之尾為辰星鞭之墮地不化石翻
向管城來著籍管城食者中山魏子孫世々多聞人後來
他族恣蠶食鼠尾猩毛遞專國千年典午復敦興不惜拔
毫輸子墨前身可惜身如龍長嘶蹴踏陰山空此生可憐
身作筆顧影晴窗嬉白日物生幻化信莫知楊生妙悟初

無師湘筠作管巧縛擬贈我忽如沙畫雖我生不能高車
乘大馬又不能萬騎橫行獵原野但能揮毫快作風雨驚
滿紙蕭々皆馬聲韓生作馬通馬語我亦與子相勞苦不
逢伯樂逢蒙恬世間萬事甯容談

垂楊歎

東風吹垂楊一日長一尺昨見鶯兒黃今作鴨毛碧眼前
幾日能春風人生一瞬成老翁老翁却憶少年好可惜太
平如過鳥那得垂楊長裊々

高旻寺三巨石歌

高旻寺旁有三石樊生為我言籍々一石正碧翡翠紋一
石紫作玫瑰圻其旁一石色更奇肪截無瑕和氏璧磊砢

皆如半閒屋離立勢同三足鬲剖分元氣太古初包孕風
煙百靈宅我昔曾經茲寺遊寶地香臺遍探厯行宮故址
亦憑眺詎見媧皇手親擲乃言交辟失奇寶別有神物潛
幽僻悵然想像如見之太華蓬壺出幽隔我思純皇昔南
幸鞭撻山精走河伯航琛輦賁窮萬有地不愛寶神供役
爾時此石亦來萃運載萬牛車脫輓陳宮三品未足珍宣
和神運甯相敵堯階當面起巖壑漢殿晴宵飛霹靂花前
劍佩走超風幄下蠻夷見驚魄天章飛白或揮灑人世風
塵敢侵迫豈知朝市有變移卧掩荆榛翳蘿薜巨靈舒掌
尚搏攫猛虎夔藩猶睽眄隕星已失史官書礪角或受村
牛厄紛々榮悴物時有榮々貞堅天所錫甘隨孤竹老薇

巖不與阿房供礎礪眼前泥水可自蔽物外風光豈嫌寐
高人志士情則同令我彷徨中感激元章下拜固其所穀
城相訪甯無跡他時一櫂向僧廬親就三峯展朝覲歸來
子細語樊生共出奇觀佐談劇

小松隱閣歌

從舅卞璞園先生風流豪舉不減顧阿瑛博收宋元
書畫築小松隱閣貯之朱孝廉葵生陳處士若木日
談讌其間稱上客先生歿所藏盡移他姓薛生晚當
時之盛不及與也今閣故在朱明闌然中表兄公歿
力改草書猶有先代風氣故為賦此

真州之卞由成陽一門忠孝可當千年遺慶到吾舅丹

山猶產雖鳳皇同光之際門閥盛雙旌列戟交輝光浮雲
富貴不到眼舉頭俗物空茫：道南起閣號松隱朱薨翼
起凌風翔披襟散髮自高嘯下簾隱几仍焚香平生書畫
有專嗜斥購不惜千金藏澄心官紙蟬翼帖宣和古錦摺
蒲裝填箱壓架幾千卷寶氣夜：輝穹蒼閣中髹几八尺
牀竹冠松塵斑絲囊朱陳文藝兩擅場朋來不待自遠方
佳時日：陳壺觴柘漿茗飲羅絲簧賞奇析義夜連曉卧
遊往：眠風廊倪家清閨項天籟後先具美誰低昂有時
拊掌一大咲行人仰首驚雷礮時人不識顧阿瑛反道癡
絕如長康風流一往四十載故家往事疇能詳高陵盡已
變深谷揚州明月寒無光挾書偶語泣遺老剝膚吸髓愁

豪商盛衰豈獨關一姓眼前物：成興亡羊曇馬策慙我
在每過故處心彷徨書囊散盡畫厨毀唯有蝸篆青苔墻
阿弢窮老親破硯草聖尚欲追崔張抱殘守闕有何好煮
字豈足充飢腸歌成回首色惆悵華嚴彈指真空王

元王彬青綠山水長卷自題仿馬和之作 先君以為東

山安石事也

林萬厝開
人元政明

天公鎔此翡翠屏塗青刷黛無時停巖犇谷走相回縈中
有線路猿猱爭嵌空巨石騫鵬鷖得霜古木千葉明如黃
夾纈錦織成背山何處搖風鈴梵宇煥儼當空撐上有飛
瀑懸青冥翔舞鵠鷺濺雪霏輶雷注壑千澗驚誰歟和以
幽絃聲長松風來響韶韻捎雲千挺筍竹萌茅茨店舍依

山橫牧兒樵客相逢迎石橋跨溪俯琮琤朱衣何人如列
卿鶴書鸞詔手所擎意欲往捐鍾山英望廬未至意已傾
豈知山人睡未醒老梅吹香透寒廳鶴聲窗下戛玉清起
來擁鼻詠洛生楸枰落子聲東丁意豈復知軒冕榮園林
勝絕通仙靈蘋風十頃玻璃瑩或坐濯足或揚舲依稀孫
許堪指名畫工妙得高隱情學馬和之藍出青恨無楊妹
點筆精馬和之畫甯宗多使楊妹子題之古來隱亦須太平有石容漱煙
容耕挂瓢洗耳物不撓少微不但今無星羣盜多於草間
螢誰能將家入巖扃捲圖悵惘我涕零龜勉與世同腐腥
不須更羨東山行

護隄謠

河水東湖水西兩水互鬭爭一隄西隄不可保東隄亦如
掃天大雷電雨以風護隄萬衆鵠立洪濤中不憂性命輸
龍公但憂蕩我之田漂我屋使我飢不得食歸不得宿龍
公龍公汝非酷吏不奪薪不屬石不蓄土不築巡河之人
兮義如玉

韓林兒管軍萬戶印歌 龍鳳四年造

五國飢寒尚餘痛忽有神孫號龍鳳王郎豈必出劉家貴
見遺民不忘宋管軍萬戶知何人中原千里皆紅巾海東
玉璽蘊不出鑄銅聊洗江南貧耕人得此郁洲側宛轉土
花文未蝕今古由來貉一丘把看令人淚橫臆濠梁不日
真龍飛勝廣驅除亦可哀世人但豔銀黃綰誰信石人一

隻眼林兒父山童偽詔曰蘊玉璽於海東借精兵於日本
又曰貧極江南富稱塞北見草木子山童舉兵時作
為石人一隻眼天
下舉兵反之識

誚夫差

王出入門左右呼而忘人殺爾父乎戰夫櫛雪檣李闔閭
有子死不死豔舞嬌歌滿宮起死父無言殺者喜城門開
越兵來王何在醉蘇臺袂亦不必掩羞亦不可滅上有子
晉之雙目下有死父之枯骨

拍環吟為陸禹言作

粲：黃金環著君手拍閒環著君指君無言奈何一朝棄
我歸黃泉憶昔相見時中心兩相知春風阻花意各自栖
一枝花開蒂接忽有時離者合合復離環空在人今已逐

殘紅飛攬君手拍心斷絕環子當還不當決世：生：兩
情熱

春蔬歎

中書萬羊天所俸儒生只合齋百壘晚來事佛畏肉食杞
菊齋廚愁屢空一年渴喜春夏交百昌競茁土無縫蕪拳
兒手萱展眉白截萋蒿青攬葑南風吹筍未成竹觶：日
荷園官送榆錢雪落誰使然松菌雷驚不須種蒿苳野覓
羞齒錄蠶豆甘香真美供風芽露葉盈都籃老饕拊腹吾
何堪去年洪流蕩江北今年戰火燒江南流亡餓殍十萬
衆飢餓內灼心如惔鳧莖生澤豈可掘鵲鰕在樹無由採
民生元化本一氣吾獨飽此應懷慙酒池波暖鼎牛函貴

人醉飽方沈酣

謝園牡丹歌其主人苦耽吟事

天公作事真奇恢鴻鈞浩：追春回裁紅暈碧窮百巧幻
此國色花中魁仙機札：親纂組化工密：相鎔裁凝苞
吐萼出真豔露為滋養風吹開雲裳霞佩九嬪列翔鸞舞
鳳羣仙來詩家筆勢正如此默與造化通根荻情田自出
官錦樣妙手不受羯鼓催人閒富貴忽掩有天機所至皆
真才曹劉李杜覩此秘豈有郊島堪追陪謝家亭館花最
好主人吟苦眉為摧眼前正可發妙悟鏤肝鉢腎何為哉
揚州洛花不多有一叢可敵雙玫瑰吉祥庵裏高過屋空
花天際絳瑤璫丁家園中錦蓋地老兵剪伐供薪柴梵天

歷劫自嚴靚貴勢過眼真灰埃君家宛委冷坊底驪珠抱
睡無人猜書來招看病未往合眼千朵紅崔嵬何時敲門
一拄杖細拾風辦巡蒼苔對花煮茗談至暮論詩並雪衰
榮哀

代耕牛歎

澤中蘆青、羣牛掉項蘆中鳴風吹牛脊出復沒可憐羸
弱難任行牧童從後來鞭著瘦骨如銅聲牛頤語童情敲
穀爾不見官家前設保牛局民田災後芟牧空官為飼牛
待民贖一牛今直二十千贖牛官索三萬錢民不贖牛甘
自買官更賣牛付屠宰宰牛無罪名保牛民不敢言牛敢
悔牛不惜骨髓軋牛不怨鞭扑酸不辭力少春耕難但願

垂頭飲血傍爾死：生：勿屬官

竹嶼吟秋圖
軋嘉閒焦山僧雪齋故物
雪齋有能詩聲卷
藏天甯寺丈室近八十年矣為作長歌

開圖颯：來秋風千竹萬竹青
摩空下有幽子行扶筇吟
聲與竹清相同悄然置我此
何地仿佛別峯庵畔蒼厓東
焦山開士昔寫此自貌吟窠
風竹裏天甯長老欣得之衣
裏寶珠深護持我今不愛卷
中畫但愛軋嘉諸老多題詩
墨或濃淡行傾歌如接談咲
親鬚眉眼中復見承平時承
平舊事誰能說六飛屢動羣
方悅江南伐鼓江北聞梵宇
行宮粲如纈巡遊豈但佛歡
喜政令每作民雲霓當時巖
穴多異人禪伯詩僧比肩出
雪公名與借庵亞歌詠明時

老禪窟結社多從陶謝遊留題往々蘇黃埒江山人物有
遷改浪打前朝去如鵲君不見桂林山手跡留焦山百家題
字紛龍鸞苦遭新貴弄筆墨鴉塗蚓結盈其閒眼前一事
有如此何況高陵為谷川成田且如此郡中名藍二十四
翠華昔最幸天甯遠與金焦分壯麗自從喪亂日荒殘屢
被師兵作營衛馬糞高於白玉階角弓或挂青螺髻先朝
法物百無有南巡時賜天甯寺紫衣等凡十有二品此卷淒涼閱人世運去
空嗟龍象衰時危豈獨風流墜請僧收畫勿復言莫驚畫
裏前人魂吾徒相對自歌哭散作秋聲撼九閭
城隍廟古銀杏歌

吾聞櫟社有大木託身神祀以自全偉哉眼前突兀見此

樹乃在廣陵城裏邑廟前此城此廟幾百年樹也更在城
之先得非鴻濛太古鬱元氣下以奠鼇極上以定青天輪
囷碑兀吁可怪萃若高陵初斷壞怒毛熊兕森欲動瞰人
神鬼藏其內九淵孰測根柢深百里坐見風雲會盤、巨
本回萬牛骨堅皮古筋相斗一枝橫出百斛舟惜不卧著
滄江流兩枝材任百梁棟竟無匠石來相求中穴只螻蟻
上巢但鵠鷗天陰日暝風颭、殿荒院古過者愁盈囷秋
實鳥銜盡塵階霜葉無人收城南贊化宮有樹亦可愛高
或遇之無此大秦松漢柏應爾倫巨壽雄姿果天賚閔宮
陰映益有神守官典祀躬秋春一朝牲酒廢咸秩空有精
靈依古根城復於隍古所歎即今豈復須貞幹幸未虞人

縱斧斤已同正士居塗炭樹乎吾起為汝歌結根曷不深山阿幹排雷雨走魑魅枝拂霄漢扶義娥河清千載雖可俟易當九厄今如何大人龍德貴高隱胡為屈蟠人世長蹉跎

為劉仲夷題供春壺拓本

我聞周旃人髫髻薛暴不入市又聞漢宣朝工匠技巧皆絕藝乃知蓋代物必出太平世民間財阜物力優春也工陶亦其例青衣纖指豈有此奴價從來能倍婢采山近取金蜀土登筵宛有鼎彝氣朱家銀槎吳霞盞茶客酒人同位置一壺流轉值千金劉侯得之喜無寐劉侯劉侯詩特工訟庭高詠聲摩空人言九事八為律藏身乃獨從壺公

擷茗龍井側汲水西泠中地鑪活火煎松風一壺在手遠
與羲皇同種搥墨拓肯致我使我感今懷古心忡忡若不
見七年海宇苦魚爛手實須征緡有筭商家貨壩爭閉門
農父田荒競流竄百工日食憂不給器窳材䟽豈供玩貴
人服御矜大秦珠辟流離盈几案春乎幸不生此日縱有
殊材甯飽飯一物雖細關隆汙良時日遠如霄漢劉侯劉
侯吾益歎此壺今幾經喪亂獨使長存閱憂患

聽哀雁

賦役兵戈遍林藪如蟻流人棄家走高空豈亦多網羅雁
爾皇々復何有風嚴雪花大如手十個同飛死八九雲霄
哀哭人得聞野老無眠夜方久獨倚空庭回白首

王陶民在蜀所寫海棠巨障歌

仙機錦織千雲霞倚天照地同一花
人間曾未見此樹畫本自出王郎家
王郎愛花復嗜酒醉膽四出森槎枒
幻中穠豔吐不盡坐挽春色回三巴
萬里歸舟載示我花光奪目不可遮
高堂寒月蜂蝶鬧邊鸞怡悵徐熙嗟
我聞蜀中海棠天下絕暖紅倒射欺金鴉
宣華苑中塞遊騎摩訶池上排香車
亂餘花事百無一補天有手誰如媧
太和元氣鍾我輩立起枯朽成根芽
江南此樹嗟獨少桃紅李白徒相誇
我欲為君走致百斛釀紅粧列侍爭
天斜驚溪練展霜色淨羯鼓聲作春雷
撾請君更寫傾城葩

題關山行旅圖

羣山正紫山木黃木末細路縈羊腸小車班：大車逐前者水濱後山腹時清千里若門庭道上行歌響相續一夢經今四十年眼明身見古秦川馱鈴霜曉驪山驛馬影斜陽硤石邊

江干待渡因遊伯先公園入門復值金松岑尹石公同登山顛廣廈談憇

譙戍醉還日未暮揖別二豪將北渡江干枯坐候桴音近地名園展余步入門拊掌一大嘆人生有緣果相遇池臺重掩樹石深休日遊人爭蟻聚子猷所至但看竹伯先誰者吾何與墜石直上蒼煙根刷翮天風快翔翥羣山西來莽回互繚白縈青到江住炊煙俯唾屋萬家碧空遙映帆

無數吾儕所得本昭曠景物亦為恣呈露涼軒廣榻借高
嘯飛鳥流雲入談麈一日之跡去若驚百年此美誰能具
歸舟回拍曲闌干猶挂離情向雲樹

過詞人丁甯女士小園

深巷闌寂稀人蹤詞人有此一畝宮小園春去尚未遠虞
美人花紛白紅昨宵霹靂急雨風自地發如撞春高牆
立仆巨木拔怪汝披拂仍丰容物能自保真有力天縱欲
戾難為功因知楚客愛香草引橘為友將毋同君今詞筆
繼朱李自寫芳潔非雕蟲金鑪睡鴨供古佛旃檀婆律煙
方濃騷人哀怨細故耳泥洹一路方無窮相期回向六如
偈君不見昨來風雨今原空
萬君默得僕畫幅作詩次韵荅之
少不如人幸不試晚作藝人甯敢恥探幽日唾萬雲山甘
被元輿弔藤紙西江一口君吸盡詩律禪鋒兩無比我喜
得君先以畫怪君見畫如我喜正憂詞源倒三峽坐令梧

鼠窮五技恭聞昔者文敏公吾祖親嘗稟杖几見聞生

長必深厚王謝靈光至今歸君其努力吾老矣墨染煙驅

亦云已

君與萬文敏皆贛人而非一族後乃知之

謝劉仲夷寄天台翠茗用山谷雙井茶韵二首

華頂靈芽潤一雨沃心不減止觀書平生願掃智者塔謝

君遺我髻中珠蔣家脩暇非秦腴破睡破禪同一如蒲團

喚起橐駝坐定中身已到西湖

時魚致蔣殷

前身洛下玉川子今讀司空城旦書人驚判筆走風雨誰

知七字唾成珠詩人自昔臞不腴消渴獨能念相如安得

夷光捧玉盃為君一舸向江湖

包右輔書來道九月望夜起循牆而步牆外老松牆中甘

蕉大月照之光景奇絕因寫長歌見寄次韵荅之

雁門老不思雪騎命宮坐值斗與箕嗟我既爾君同之百

年袞：熟羊脾

通鑒考異定此字是脾非胛

猶復未免梁鴻噫書來快

事報我知彌天四海我與而不子之語當語誰疇昔之夜

皎不疑循牆顧影為娛嬉老松挈空俯而窺髣髴猱攫蒼

髯垂大蕉雉尾宮扇移似聞下有我履慕仰見皓月光射

鬚四無人聲更漏遲微風潛鼓十萬師蕉陰松籟交橫馳

冰壺身入詫此時東坡千載不可期姑以告子兼自怡我

觀人生如弈棊收枰畢竟肩相差觀瓶與使居井眉坐嚙

腐鼠爭枯醬昌如散髮縱四支浩然天遊中不羈月其慰

子鉤子詩欲子不復追無涯使子縱筆叫餓鵠與我共作

詩中癡

寶竹坡侍郎輓鮑穆堂中丞詩墨跡中丞孫執之屬題

騷經原本昭景屈西京封事劉向絕一家骨肉痛痒同陰

雨鴟鴞口流血千秋寶公復繼起四諫之中疏獨戚

當時名諫

官四人獨寶為宗室淋漓肝膽奉至尊餘事文章亦披瀝眼前驪珠

四十顆中丞輓章侍郎筆中丞典樂教胄子侍郎負牆承

講述騎箕去日投劾歸夢繞脩門憤猶鬱故都秋色今喬

木荆棘王孫誰寶玦文孫守此五十年示我相看痛至骨

君臣師友彼何世地老天荒忽華髮與君先世皆秉鉞忍

恥草閒尚偷活擲筆看天隱嗚咽

